

PRIMERA CARTA DEL APOSTOL SAN PABLO A LOS CORINTIOS

Pablo embesa Jesús quiato Corinto jenda je

¹ Pablo, i que seje ra. Dios que seirabo Jesucristo renei nenei sacua nda. Aico ã mbesa jêje a. Nanderesenda Sóstenes ndese aico embesa jêje a.

² Aico ã mbesa jêje a. Jesús icuasa je. Corinto jenda je. Jê ndei Dios quiato jêingo Jesucristo rîi ãquî. Dios riqui jemingo icúe umbaerã ãquî. Sã Dios riqui mangue jenda chooñoa mingó icúe umbaerã no, eî si. Ñee mose Jesucristo je. Jesucristo rei ãquî abe rerecua no. Sã nandererecua nande no.

³ Sã Dios nanderu uturã mingó tuchi jendese. Sã Dios jembia bei mingó. Sã Jesucristo abe siqui jembia bei mingó.

Dios turãte riqui jêje co, i Pablo

⁴ Dios turã tuchi que eriqui jêje Jesucristo rîi nda. Nyebe aico nguiã gracias i tuchi Dios je jeni co.

⁵ Jesucristo quiato chõ jê cote re. Nyebe Dios riqui turã tuchi nguia jêje co cote. Jembaaquiatu tuchi ucheẽ nenei nenei sacua mbia je. Jembaaracua tuchi que ucheẽ ni nda.

⁶ Ure Jesucristo renei nenei mose jêje que jêisi turãte ra. Jê Jesucristo jêicuate quia ãquî cote.

⁷ Nyebe Dios turã ndiqui nguiã hui ãte jêsi co. Jembirãcuã mbeite equia querabe co. ãquî jêingo Jesucristo raarõ arõ ãquî.

⁸ Dios ra jembirãcuã mbei mingo mbae ua ja chee. Mbia mo nda ñee icuã eã jêje Jesucristo tu mose.

⁹ Dios ra jendeaquiato bei. Ucheẽ nda embuchebiã mbei ñeende jêje. Ae quiatu ngue ñee nguiã jêje. —Taemingo bei seriirĩ ndese Jesucristo rese, i.

Jesús quiato nyao nyao chõchĩ nyesi

¹⁰ Seresenda, nandererecua ja chõ Jesucristo resẽ. Jenyao chao mose nyesi, eicuãte ãquĩ. Hue rĩ ja chõ jẽingo ndua ndua. Mbae mĩ ndese chõ jẽingo.

¹¹ Mbia quiatu ngue ñee nguiã seje. —Eicuã icuãte que nyue ra, i que Cloé chuchua jenda ñee sembiirandu jenĩ nda.

¹² —Pablo mbae chõ se re, i chõchĩ jemo nguiã serĩ ãquĩ. —Apolos mbae chõ se re, i chõchĩ jemo nguiã ãquĩ no. —Pedro mbae chõ se re, i chõchĩ jemo nguiã no. —Cristo mbae chõ se re, i jemo no.

¹³ ¿Cristo mbuchao chao ji ere no? ¿Pablo mano jendiquicharõ nde no? ¿Pablo rĩ bautizar i jêje re no?

¹⁴ Se que bautizar ae eã jêje resẽ. Crispo mĩ je que bautizar ae ra. Gayo je abe.

¹⁵ —Pablo rĩ ño ngue bautizar i nguiã seje, i aroneate jemo ñee serĩ.

¹⁶ Estéfanos chuchua jenda abe que bautizar ae ra. Aquere que bautizar ae ãte jemo je ra.

¹⁷ Bautizar i sacua eã ngue Cristo semondo ra. Ucheẽ turã nenei nenei sacua ño ngue semondo nguiã. Seaquiato asaã saã eã ño nguiã Dios cheẽ nenei nenei co. Cristo cheẽ ambiasa mingue turã

ño nguiã co. Se seaquiato raã naa mose, ãnda mbia ndua ndua eãte rei Cristo mano ndese.

Dios cheẽ quirãcuã tuchi Jesús rñ

¹⁸ Ae ra nyoĩ tata cuásuu, ãquĩ ndei “ichõĩñoosa” isa Dios cheẽ nenei neneisa rñ. —Cristo que mano mbia riquicharõ nda, i mose ee, “ichõĩño ñene” i chõ nguiã. Nande quiato que Dios nanderirõ nandeicuã si ra. Nyebe Dios cheẽ turã ndiqui nguiã uquirãcuã ndeacuquia nande je co.

¹⁹ ã ndei Dios cheẽ mbesa ji ã:

Ae “seaquiato tuchi” i quia, ãquĩ aquiato ra ambuquiachã esi.

Ae “searacua tuchi” i quia, ãquĩ aracua abe ra ambuquiachã esi no, i que Dios cheẽ mbesa ji ra.

²⁰ Ae uaqiatio saã saã nguia, ibi jenda ja chõ ãquĩ nde. Ae ucheẽ aquiato saã saã nguia, ibi jenda ja chõ ãquĩ no nde. Eaquiatoãte ãquĩ, i chõ Dios nguiã ãquĩ je.

²¹ Mbia ae ra Dios icuayã mbei uaqiatio ae je. Dios cheẽ ae je quia nda mbia Dios icua nguiã emo Dios cheẽ nenei nenei mose ee. Ae Dios cheẽ isi nae, ãquĩ nda Dios sirõ eicuã si. Ichõĩño nguiã, i raque mbia ataque Dios cheẽ nñ.

²² —Mbia mae sayã ndese nda uremae na ña, i bei que judíos quia ra. —Urechĩmbaaquiato tuchi rã, i bei que judíos eã nguia ñee nyue no nda.

²³ Nande quiato Cristo nandesenei senei nguia ã. Ae mbia mbucha quia ira rese, aque chõ nandesenei senei nguia nande ã. ãquĩ si judíos ireĩte riqui ã. Cristo renei nenei mose, judíos eã ndua eã tuchi chõ nguiã erese ã.

24 Nande quiatu nandebite riqui nguiã Cristo renei nenei mose ã. Dios judíos mo irabo chõ nguiã. Judíos eã mo abe irabo chõ nguiã no. Ûquĩ je chõ ngue Cristo Dios quirãcuã mee nguiã. Ûquĩ je chõ Cristo Dios aquiatu mee nguiã.

25 Dios aquiatuãte, i raque mbia mo ñee Jesús mano je riĩ. Dios quia eaquiatu tuchi jiri riqui nguiã mbia si co. Dios quirãcuã neate, i raque emo ñee no. Dios quia equirãcuã tuchi jiri riqui nguiã mbia si co.

26 Dios que jëirabo ja ra. Jëaquiatu tuchi eã ndaque ee. Ererecua eã ndaque jë. Mbaecha eã ndaque jë. Dios ae chõ ngue jëirabo nguiã. Ûquĩ ndese jendua jiri.

27 Ae je mbia riqui “eaquiatuãte” i nae, ùquĩ ño ngue Dios irabo nguiã. Ae ucuasu saã saã nguia nae, ùquĩ ireĩ ireĩ sacua esi.

28 Ae mbia ataque ucuayãte quia nae, ùquĩ ño ngue Dios irabo nguiã. Ae ucuasu saã saã nguia nae, ùquĩ mbutiã sacua.

29 Nyebe nandeico nguiã nandeaquiato raã naa aroneate Dios je ã. Nande mi mo jiri jiriã.

30 Dios quiatu que nandembucha Jesucristo rese ra. Ae quiatu que nandembiirandu Dios rese ra. Ae chõ ngue nandechiã mbuturã no nda. Ae chõ ngue nandemingo icúe Dios mbaerã no nda. Ae que mano nanderiquicharõ no nda.

31 Sã embesa ji riqui ñee ã no:

Ae Dios saã nande je nae, ùquĩ ni nandechee turã.
A e nandesaã nande ae nae, ùquĩ ni nandechee
turã eã,
i que embesa ji ra.

2

Jesucristo mii Pablo senei senei mbia je

¹ Seresenda, seso mose jendea que Dios cheẽ asenei senei turã jẽje huee resẽ. Seaquiato asaã saã eã ño nguiã jẽje Dios cheẽ nenei nenei.

² —Jesucristo mii ño tasenei senei jẽje. Jesucristo mano nguia mbia icuã ndiquicharõ nae, ñquĩ mii ño tasenei senei jẽje, ae chõ ngue oso nguiã ñee jẽje.

³ Seireite que seso mose ñee jẽje nyii ra. Semburirite que aque mose ra.

⁴ Seaquiato que asaã saã eãte quia ra. Dios cheẽ ngue ambuchecua tuchi quia ñee ñee jẽje ra. Espiritu Turã nguiato que secheẽ mbirãcuã tuchi quia ñee ñee jẽje ra. Nyebe mbia ñee nguiã. —Dios cheẽ ño eriqui re, i nguiã secheẽ mose.

⁵ Dios quirãcuã ae jemingo nguiã Jesucristo rese ñquĩ. Mbiamo aquiato eã ño jemingo nguiã Jesucristo rese ñquĩ.

Espiritu Turã ndiqui mbae icua jate nande je co

⁶ Ae seaquatute, ñquĩ ja chõ asenei senei mbei nguiã Jesús quiato je co. Ae seaquatute nae, ibi jenda rã eã ño seaquiato riqui nguiã co. Ae seaquiato nae, ibi jenda rerecua rã eã ño seaquiato riqui nguiã co. Ñquĩ aquiato quia ra tiã jei.

⁷ Ae ureico ñee ñee nae, ñquĩ nguia mbia mbaaquiato jiri nguiã. Dios cheẽte quia ñene. —Secheẽ nda ambuchecua je nguiã mbia je. Mbiamingo bei sacuã, i que Dios nyii mbae ao nonde ra. Dios que esenei eã nyii ra. Namonõ embuchecua nguiã nande je cote.

⁸ Mbia rerecua que Dios aquiatu icua eãte ra. I nda eriirĩ mbuchá eãte rei ira rese.

⁹ Sã embesa ji riqui ñee ã no:

Dios ra mbae turã saã tuchi nande je. Uchesequa je.

Ae ra Dios saã nande je, ñquĩ ndese emo iranuate namo.

Emo mae ãte erese namo, i que embesa ji ra.

¹⁰ Nande quia nandeico nguiã irandu erese ã. Espíritu Turã quiatu nandembiirandu nguiã. Espíritu Turã nguia mbae icua jate nguiã co. Dios chiao abe icua jate equia co.

¹¹ Ae rese emo ndiqui ndua, mbia mo ñquĩ ndua ndua icuayãte. Ae rese nandeico ndua, nande ae nandeicua nguiã. Ae rese Dios riqui ndua, Espíritu Turã mi ño eicua nguiã. Dios sí chõ Espíritu Turã nde.

¹² Dios que espíritu mbuae mo monoã nande je ra. Espíritu Turã ño ngue emondo nguiã nande je. Ae Dios saã turã nguia nande je nae, ñquĩ ndese nandembiirandu sacua ño ngue Espíritu Turã mondo nguiã nande je.

¹³ Ae Dios saã turã nguia ure je nae, ñquĩ uresenei senei nguia ã. ã ndese chõ ngue Espíritu Turã urembaaquiato nguiã. Mbia cheeño eã ño ñene. Nyebe aico nguiã Dios chisaã nenei nenei Dios quiato je co.

¹⁴ Ae Jesucristo icua eãte, ñquĩ sí Espíritu Turã ñee icuayãte quia ã. Echeẽ mbaranguiatuãte riqui ee ã. Nyebe eriqui nguiã echeẽ isiãte.

¹⁵ Ae Jesucristo icuate nae, ñquĩ nguia mbae icua jate nguiã ã. Ae eturãte nae, ae eicuãte nae, ñquĩ

icua ja equia ã. ¿Mañi Jesús quiato quia re? i chõ mbia nguiã Jesús quiato cheẽ icuayã ã.

¹⁶ Tarembaaquiato, i aroneate mbia mo Dios je. Dios quiato eã mo ndua eãte quia Dios rã si ã. Nande quia nandendua ndua nguiã Cristo ndua rã si ã. Dios resendate quia nandeico nguiã ã.

3

Mbae mi na ño ureico nguiã Dios cheẽ nenei nenei

¹ Jesús resenda jëingo raque ãquĩ. Jëingo tuchiãte quiato nguiã erese ãquĩ. Ae jembite riqui nae, ãquĩ mi ndese chõ jëingochĩ nguiã ãquĩ. Ae Cristo bite nae, ãquĩ ndese jëingoã ñochĩ nguiã ãquĩ. Nyebe jaembaaquiato tuchi aroneate equia co.

² Mbia riirĩ na ño jëingochĩ nguiã secheẽ andu mbirĩ mbirĩ cose. Querabe chõ jëingo nguiã secheẽ andu sereã ãquĩ. Nyebe jaembaaquiato quiato tuchiã nguiã Jesús cheẽ ndese. Ae jembite riqui nae, ãquĩ ndese jëingo mose ra Dios cheẽ jëicuayã mbei.

³ Jëicuã icuãte quia jëingo nguiã jenyue ãquĩ. Jendua turã ja eãte equia ãquĩ. Jeñee turã turã eãte quiato nguiã jenyue ãquĩ. Nyebe acheẽ nguiã jëje. —Ae Cristo bite nae, ãquĩ ndese jëingoã ñochĩ nguiã ãquĩ, ae chõ ndei nguiã jëje co.

⁴ —Se rei Pablo mbae, i chõchĩ jemo nguiã ñee ãquĩ. —Se rei Apolos mbae, i chõchĩ jemo no. Nyebe jëingo eã nguiã Cristo bi rese ãquĩ.

⁵ ¿Aba chõ se chã? ¿Aba chõ Apolos no ña? Mbia rerecua eã ño ureico nguiã ã. Dios cheẽ nenei

neneisa chõ ureico nguiã ã. Ure Dios cheẽ nenei nenei mose jêje que Jesús jêicua resẽ.

⁶ Mbae tiquia ji rã ño jê nde. Sã emo mbae eĩ tiquia no. Sã emo i icherẽ cherẽ erese no. Dios ae chõ embusuri nguiã. Anyae chõ ngue Dios cheẽ mingue nguiã jendese. Apolos chõ ngue jem-baaquiato quiato nguiã cote. Dios quiarei ucheẽ mbusuri raanguia jeñiangui re.

⁷ Ae echitiquia nae, aque embusuri aroneate. Ae i icherẽ cherẽ erese nae, aque abe embusuri aroneate no. Dios ae embusuri nguiã.

⁸ Ae echitiquia quia, ae i icherẽ cherẽ nguia erese, eĩ si chõ ãquĩ nde. Dios ra mbae turã mee ee, ae esaã ãquĩ ndibishorõ.

⁹ Ure rei Dios cheẽ naa naasa. Sã chacocho no, eĩ si chõ Dios mbae jê nde. Sã tuchuacha no, eĩ si chõ Dios mbae jê nde.

¹⁰ Dios turã tuchi que seje ra. Seje quiato ngue ucheẽ mee nguiã. Mbia mbaaquiato quiato sacua. Tuchua ao aquiato rã ño se re. Tuchua i raanguia chõ asaã nguiã base cote. Aque arõ ño emo ndiqui nguiã tuchia ao hue no. Ae tuchia chao sechisaã arõ nae, sã eraã mingue turã.

¹¹ Tuchua i raanguia chõ Jesucristo riqui nguiã. Ae mĩ tuchi chõ tuchia i raanguia re.

¹²⁻¹³ Ae arõ tuchia mo nandesaã arondete. Sita je eraã mose, siqui turã mbei rae. Oro je eraã mose, siqui turã mbei ra eno. Plata je eraã mose, siqui turã mbei ra eno. ãquĩ je eraã mose, oquei eã nda Dios tata mbu mose. Ira je eraã mose, oquei chõ ndae. Quiata je eraã mose, oquei chõ nda eno. Nandechisaã nda Dios tea ja.

14 Nandechisaã siqui i i mose, Dios ra mbae turã mee nande je.

15 Nandechisaã oquei mose, nandembae ra quiachã nandesí. Nande quia ra nandequiachãyã ndaque. Nandecuasẽ ndaque ra ibate Dios je. Nandechi quiatu ra nandeico cote.

16 ¿Jêtesarei chõ ere? Dios chuchua chõ nanderete riqui co resẽ. Dios riqui beite nandeye co. Espiritu Turã ndiqui beite nandeye co.

17 Emo Dios chuchua mb#cuã mose, aque ra Dios mbutiã. Nande quia Dios chuchua re. Dios que uchuchua mi icúe umbaerã nda. Nanderete je sichõ nandeico nguiã ñee co. Dios chõ nandemingo nguiã icúe umbaerã co.

18 –Nandeaquiatute, jenyechĩ nguiã jeñiangui re ãquĩ. Ae eaquiatute ibi jenda achõ ndese, sã ãquĩ uaquiatu raã naa eã. Siqui mingue mose ra Dios embaaquiatu turã cote.

19 Ae eaquiatute ibi jenda achõ ndese, “eaquiatuã”, i chõ Dios nguiã ãquĩ je co. Sã embesa ji riqui ñee no:

Dios ra ãquĩ aquiatu mbutiã ño cote.

“Seaquiatu tuchite aico co”, i quiatuchĩ ngue nyii re,
i que embesa ji ra.

20 Sã embesa ji riqui ñee no:

Ae rese eaquiatu riqui ndua nae, ãquĩ Dios icua tuchite quia cõ.

Ndua ndua iru chõ nguiã,
i que embesa ji ra.

21 ¡Mbia aquiatu mo ndese ra jeñimbucha chooñocheñ jê! Dios quiatu que mbae mondo ja jêje ra.

22 Jembae chõ se re. Apolos abe rei jembae no. Pedro abe rei jembae no. Mbae ibi jenda ja rei jembae. Dios mbia mingo mose, jêje chõ emingo. Dios mbia mingo eã mose, jêje chõ emingo eã. Ae siqui quia namo, jembae ja chõ ùquĩ nde. Ae ra siqui aquere, jembae ja chõ ùquĩ no nde. Jembae ja chõ ñene.

23 Cristo mbae chõ jê nde. Dios mbae chõ Cristo no nde.

4

Ureaquiatu tuchi Jesús chimbaaquiato si, jenyechi nda jê

1—Cristo rimba ja chõ ùquĩ nde, jenye chõ serii. Apolos riñ abe no. —Ae ambuchecua eã mbia je nyii, ùquĩ jembuchecua checua mbia je serii cote, i que Dios ure je ra.

2 Dios rimba mose nande, Dios cheẽ nandemumbayã mbei chõ nguia.

3—Serimba turã ño nde re, i ra Dios seje reae. Nducua. Aicuayãte se. —¿I se jêje re? ae ãte se quia jêje co. Ae ãte se quia emo je co no. Dios miñ ño seicua nguia.

4 Dios rimba turãte aico reae. Dios ae chõ seicua nguia.

5—Dios rimba turã ño aque re, jjenye jeichĩ nda emo niñ jê! Jesucristo tu mose, ae quia ra mbae mbuchecua ja. Ae ra nandendua ndua mbuchecua ja. Aque mose quia ra Dios ñee. —Co

rei serimba turã tuchi co, i ra Dios mbia mbiirandu aque mose cote.

⁶ Jembaaquiatsu sacua ño aico nguiã ñee jêje co. Sechue si chõ aico nguiã ñee. Apolos rií abe chõ aico nguiã ñee. Dios rimba achõ ño ure re. Ure mii mo ndui jêingo bei aroneate. Dios rimba ja rui chõ jêingo. Eí jenye mose ra embesa ji jemumbayã.

⁷ ¿Mbaerã nda jêcuasu jêsaã saã nde? Ae jendeco jembraerã nae, Dios chimondo ja chõ ãquĩ nde. Jêaquiatsu mose, Dios ae jembaaquiatsu nguiã. —Se ae que sembae asaã saã nda, jjenyechĩ nda jêcuasu raã naa jẽ!

⁸ —Ureaquiatsu tuchite cote, jenyechĩ ngue ñee nda. —Ureico Dios cheẽ icua jate co, jenyechĩ ngue ñee no nda. Ererecua tuchi jêsaã saãchĩ ureririrõ cote. Ererecua jêsaã ñooño na jẽ no. Se abe ra ererecua asaã saã ndei jẽ na ndeae.

⁹ Dios ucheẽ nenei neneisa quirirõ jiri ure reae. Mbia tarõ ji rã ño ureico uremano ndaarõ arõ ndeae. —¿Mañi ã nguia re? i tuchi mbia quia mae nguiatsu urerese co. Angeles abe ñee nyee mae nguiatsu urerese.

¹⁰ Ureico tuchi mose Cristo rese, “eaquiatsuã”, jenye chõchĩ equia ure je ãquĩ. “Ureaquiature ure”, jenye chõchĩ equia jẽ jêingo mose Cristo rese ãquĩ. Urequirãcuã neãte ure, jẽ jêquirãcuã mose. Mbia ureosei chiãte ure; jẽ nguia mbia jêoseite nguiã.

¹¹ Mbae eã mbeite urembae namo abe. Ure-riãcuã ãcuãte que eriqui emo mose ra. Ureiseite abe que eriqui ra. Ureirao eãte abe no. Mbia icuã icuã mbeite ure je. Urechuchua eãte abe no.

¹² Mbae uresaã saã tuchite quia ureo je co. Mbia

icuã icuã mbeite riqui ure je co. Urecheẽ turã turã mbeite equia ure ee ã, ãquĩ ñee icuã icuã mose ure je. Urehecua chõte equia ñimbirãcuã ee ã.

¹³ Urecheẽ mingue beite equia ãquĩ ñee icuã mose ure je ã. Mbae quía rã tuchi chõ ureico nguiã mbia je ure ã. Mbia ureririrõ mbeite quia namo nyee ure ã.

¹⁴ Jẽireĩ ireĩ sacua eã ño aico nguiã ã mbesa jẽje ã. Jemundua ndua sacua ño ñene. Seriiĩte quia jẽnde.

¹⁵ Jembaaquiato quiatusa tubiriãte raque Cristo rĩ. Se mi tuchi chõ jendu re. Se rane nguiatu ngue echeẽ turã asenei senei nguiã jẽje nyii. Se quiatu ngue Cristo aicua uquia nguiã jẽje. Nyebe aico nguiã “seriiĩ” i beite jẽje co.

¹⁶ Nyebe jẽingo se rã si.

¹⁷ Timoteo amondo quia jẽje aque. Ae rei sechimbaaquiato tuchi. Nyebe “seriiĩ” ae tuchi nguiã ee. Ae quiarei siqui turã tuchi Dios rese. Ae ra jemundua bei secheẽ ndese. Sechisaã ndese abe no. —Eĩ ngue Pablo quia Jesús quiato mbaaquiato quiato sucha mbuchesea sea mose ra, i ra Timoteo jẽje seriiĩ.

¹⁸ Jemo ndiqui uaquiato raã naa tuchichĩ ãquĩ. —Pablo ra tu eã mbei urerea, i chõchĩ jemo nguia seriiĩ ãquĩ.

¹⁹ Aso jei ra jendea, Dios eno i mose seje. Ae uaquiato saã saã tuchi quia jemo nae, ãquĩ tatea cote. Mañi nda equia mbae raã ndeae. Echeẽ achõ achandu sereã.

²⁰ Dios rimba cheẽ achõ aroneate. Siqui eã mose Dios quirãcuã ndese.

²¹ Manyae ra jêje seso mose jendea reae. Acheẽ asi asi ra jêje reae. Aico mingue chõ nda jêje renoae. Jêhui mose jêicuã si, acheẽ asi asi eã nda seso mose jendea.

5

Ae siqui ngu ninisi rese, aque jemombo

¹ Mbae icuã tuchi rese que ureirandu jendese ra. Jemo nda siqui siqui ngu ninisi rese ra. ¿Mbaerã jêataque jêtea chooño mbae icuã naa mose re? Ae Jesús quiato ãte nae, ãquĩ ãno siqui ãte ngu ninisi rese. ¿Mbaerã Jesús quiato quiatu siqui ngu ninisi rese re?

² Jêturã jêsaã saã mbei chõchĩ nguiã jê ãquĩ. Jêya eã eã ãno jêingochĩ ãquĩ ndese ãquĩ. Jêireĩ ngũĩã tuchi chõchĩ. Ae siqui ngu ninisi rese, ae jemombo eã ãnochĩ jêñumunua nuasa si.

³ Ishote aico raque jêsi co. Andua beite sequia jendese co. —Ae siqui ngu ninisi rese, aque jemondo Satanás je, ae chõ nguiã sechianguĩ re co. Se siqui raanguia jendese.

⁴ Jêñumunua na Jesús quiato hue jenda. Se abe ra andua ndua jendese. Jesucristo quirãcuã abe ra siqui tuchi jendese jêñumunua mose.

⁵ Ae siqui ngu ninisi rese nae, aque jemombo chõ jêsi. Jesús quiato si. Jemee ãno Satanás je. † nda Satanás erete mbasi. † nda eã siqui bei Jesucristo tu mose cote.

⁶ ¿Mbaerã jêingo jêturã naa naa mbae icuã ndea chooño nde? Levadura rã ãno mbae icuã nde. “Levadura ãnetê nda oso raque mbichae raã namo mose. Mbuchimatã ja rae”. ¿Õquĩ jêñanuãte quia re?

⁷ Ae eicuãte nae, aque jemombo jësi. I nda jë abe mbae icuã jësaã eã. Dios que Jesucristo iquia nandeicuã ndibishorõ nda. Sã mbia riqui oveja iquia iquia huicuã ndibishorõ no.

⁸ Nyebe nandeico turã na Dios rese, mbae icuã naa naa ndocoĩ. Cochee nandeico. Nandeicuã nandesecha ja.

⁹ –Ae siqui emo ninisi rese, ũquĩ je ra jeñee ñeechĩ, ae que secheẽ mbesa mondo jëje nyii.

¹⁰ Ae Jesús quiato ãte, ũquĩ ñi eã ño ngue acheẽ nguiã jëje. Nandechẽ eã aroneate Jesús quiatoã je nandeico mose íbii. Ae siqui quia emo ninisi rese nae, ae abei chiãte riqui nae, ae mbae mbuquiachã nguia nae, ae siqui Dios abareã ndese nae, ũquĩ je nandechẽ eã aroneate.

¹¹ Jesús quiato mo ũquĩ icuã naa mose, jemombo chõ jësi. Jeñee ñeechĩ nda ee. Emo ninisi rese siqui mose. Abei chiã mose. Dios abareã ndese siqui mose. Uchuru rerequia chooñoã mose. Quiacua mose. Mbae mbuquiachã mose. Jesús quiato ũquĩ naa naa mose, jëhui chõ esi. Jëquiaru jiri jiriã tuchi ũquĩ ndese.

¹² Jesús quiatoã nandeteaquiato aroneate. Ae Jesús quiato, ũquĩ nguiatu nandeteaquiato.

¹³ Dios quia ra Jesús icuasa reã mbasi. Ae siqui ngu ninisi rese nae, “Jesús quiato se”, i rei quia nae, aque jemombo chõ jësi.

6

Jemo icuã icuã mose nyue, jë ae chõ jëingo

¹ Jemo icuã icuã mose nyue, jësochĩ nguiã ñee Jesús quiatoã nderecua je. Jë ae chõ jemae erese

ae. Jêicua ae. Sã Dios quiato achõ ño ñee ùquĩ je. —¡Eĩ jenyee jê! i ùquĩ je.

² Dios quiato quia ra “¡eĩ jenyee jê!” i ja Dios quiatoã je emo mose. Jê nguia ra “¡eĩ jenyee jê!” jenyee mbia ataque je emo mose. ¿Mbaerã jêingo “¡eĩ je nye jê!” ise reã mbae ñetẽ naa mose re?

³ Angeles je abe chee ra “¡eĩ jenyee jê!” nande. ¿Ùquĩ ndese jêiranuãte re? ã ibi jenda je “¡eĩ jenyee jê!” nande turã ja rã ae.

⁴ Jesús quiato chõ jê nde. Ibi jenda mo ñi jemo icuã icuã mose nyue, jê ae chõ jemaee ùquĩ ndese. Jêsochĩ nguia ñee Jesús quiatoã nderecua je. Dios quiato eãte quia ùquĩ nde.

⁵ Jesús quiato mo ñee icuã icuã mose nyue, ¿jemo jêaquiatuãte ñee ee re? “¡Eĩ jenyee jê!” i ee re. Jê jêireĩ ireĩ sacuã ño aico nguia ñee jêje ùquĩ.

⁶ —¿Mañi ure ra re? i aroneate Jesús quiato ñee Jesús quiatoã nderecua je.

⁷ Jemo Jesús quiato mo icuã icuã mose nyue, echia turã tuchi ãte quia ñene. Jeñimbirãcuã ño mbae icuã naa mose jêje. Jeñimbirãcuã ño jembae mbuquiachã mose no.

⁸ Jê abe mbae icuã jêsaã saã ñochĩ, ñimbirãcuã ndocoĩ. Jê abe jendesenda mbae jembuquiachã ñochĩ Jesús quiato mbae, ñimbirãcuã ndocoĩ.

⁹⁻¹⁰ Mbia rerecuarã tuchi ra Dios cote. Aque mose ra mbia icuã siquiã tuchi Dios rese. Ae siqui emo ninisi rese nae. Ae siqui ngüinisiã ndese nae. Ae ndua chooño nguia Dios abareã ndese nae. Ae siqui quia nyiese ngüinisi raã naa nguesenda je nae. Ae mbae mbuquiachã quiachã nguia nae. Ae

abei chiãte riqui nae. Ae quiacua quiacua quia nae. Ae ucheẽ mondo chooño mbeite quia mbia je nae. Ñquĩ nda siquiã tuchi Dios rese. —Eicuã abe ra siqui bei Dios rese, jjenyechĩ nda ñimbũĩrĩ irĩ jẽ!

¹¹ Eĩ ngue jemo icuã cose ra. Dios ae jembitirõ nguiã cote. Dios chõ jemi nguiã icúe umbaerã cote. Espíritu Turã ngue jëisi turã Jesucristo rĩ cote ra.

Espíritu Turã nyuchua chõ jendete re

¹² —Co rese ra ereicochĩ, i ãte raque Dios quia seje mbae mo ñi. Dios biãte nande mbae raã ja chooño mose. Mbae mo sembũcuã serĩ mose, asaã eã mbei ra se.

¹³ Nandechiurã ndei nanderie ye sacuã. Nanderie rei nandechiu rirurã. Ñquĩ ja ra Dios mbutiã emo mose cote. Dios mbaerã ño nanderete re. Siqui chooño sacuã eã ño emo ninisi rese chõ nanderete re. Nanderete rerecua chõ Dios re.

¹⁴ Dios quirãcuã ño ngue Jesucristo raaque mbuquera nguiã. Eĩ ño nda Dios quirãcuã nanderaaque mbuquera nguiã nande abe no.

¹⁵ ¿Jëiranuãte quia jendete rese re? Cristo nanderete mbucha quia uchiese co. Cristo rete chõ nandeco nguiã co cote. Cristo rete nandembucha aroneate cuña icuã ndete mo ndese.

¹⁶ Emo siqui mose cuña icuã mo ndese, erete ucha chõ nguiã nyiese aque. Erete nyeremo eã ño cote re. Ñquĩ ndete ja ra co mi cote, i que Dios cose ra.

¹⁷ Emo siqui mose Cristo rese, nguete mbucha chõ nguiã erese ñquĩ cote. Erete mi na ño ñquĩ cote re.

18 Jjeninisiã ndese ra jẽingochĩ jẽ! Mbae icuã mo naa mose, ũquĩ nda nanderete mbũcuã yã jiri. Siqui mose ngũinisiã ndese, ũquĩ nguia ra nanderete mbũcuã tuchi cote.

19 Espíritu Turã siqui chee jeñiangui re ũquĩ. Espíritu Turã nyuchua chõ jendete re. Dios mbae chõ jẽ nde. Jembae ae eã ño jendete re.

20 Eicuã nimba rei ngue jẽ nyii re. Dios quiatu ngue jẽisi nguiã cote. Nguirĩ ngue emondo jendibishorõ nda. Nyebe jẽingo jendete mee Dios je. Jẽaĩ abe jemee ee noae.

7

Pablo mbia mbaaquiato emo ngũinisi rerequia rĩ

1 Jeñee ngue jembesa mondo seje nyii nae, ũquĩ tasibishorõ jẽje cote. Coche emo siquiã nguiã cuña mo ndese.

2 Coche mbia ngũinisi ae rerequia nguiã. Coche cuña ngu mũ nderequia nguiã no. Emo ndese siqui chooño eã sacuã ño ũquĩ nde.

3 Sã eru riqui turã ngũinisi rese. Sã eninisi abe riqui turã ngu rese. Nyao aroneate nyesi.

4 Eninisi rete chõ eru mbae cote re. Eru rete chõ eninisi mbae cote no nde.

5 Nya i aroneate eru ngũinisi je nguete rese ngueteã. Nya i aroneate eninisi nguete rese ngueteã ngu je no. —Nandechẽ mbei Dios je namo, siqui rocoĩ nyiese, i mose nyue, eturãte ũquĩ. Sã eriquibe nyiese aquere cote. Ñee ñeende Dios je cote. Siquibe eã mose nyiese, ñimbirãcuã eã arõ ndete. Satanás embũcuã arõte cote.

6 —Jeninisirã jendeco, ae ãte quia jẽje co. — Jeninisibi mose, jendeco ae, ae chõ nguiã jẽje co.

7—Sã Jesús quiato ja ninisiã ndiqui se rã si, ae rei que se ra. Dios cheẽ eã ño ãquĩ nde. Nandechisaã ae aerã ño Dios mondo nguiã nande je. Emo ninisiã siqui turã arondete. Emo ae ngũinisi quereco sete nguiã no.

8 Ae eninisiãte nae, ãquĩ je tacheẽ. Eru cheecha je abe tacheẽ no. Coche jẽingo nguiã jendu eã. Coche jeninisiã ndiqui nguiã no. Se rã si.

9 Jeñimbirãcuãyã mose jendete je, jeninisirã mo jẽtea ae. Jendurã mo jendeco noae. Mbia mo osei osei rocoĩ.

10 Ae ngu quereco nae, sã ãquĩ ngu rechayã mbei. Jesús cheẽ tuchi chõ ãquĩ nde. Secheẽ ae eã ño ãquĩ nde.

11 Cuña mo ngu recha mose, sã eriquiã mbei emo ndese. Sã ae ae chõ ndiqui bei, ñimbuca si eã mose ngu rese. Sã eru abe ngũinisi rechayã mbei.

12 Se ae tacheẽ cote. Jesús cheẽ eã ño ã cote re. Jesús quiato mose emo, sã eriqui bei ngũinisi rese. Jesús quiatoã ndaque eninisi. Eninisi siquise mose ngu rese, sã eru siquichõ erese.

13 Jesús quiato mose cuña mo, sã eriqui bei ngu rese no. Jesús quiatoã ndaque eru. Eru siquise mose ngũinisi rese, sã eninisi siquichõ erese no.

14 Jesús quiato mose eru, eru ngũinisi mbucha arõte quia Jesús rese co. Jesús quiato mose eninisi, eninisi ngu mbucha arõte quia Jesús rese co no. Eĩ nda eriirĩ abe Jesús icuayãte rei, ãquĩ ande.

15 Jesús quiato mo ninisi siquiã mose Jesús rese, “seru tasecha” i bei mose, sã eru eriquisã quisã eã. Cuña mo Jesús quiato mo ndu siquiã mose Jesús rese, “seninisi tasecha” i bei mose, sã eninisi ngu

riquisã quisã eã no. Ûquĩ naa mose, Jesús quiato mbae icuã saã eãte. —Sã seriirĩ ndiqui turã nyue, i quiatu que Dios nande je ra.

¹⁶ Ae Jesús quiato nae, ùquĩ ngũinisi mingo arõte Jesús rese. Ae Jesús quiato cuña nae, ùquĩ ngu mingo arõte Jesús rese no.

¹⁷ —Eĩ jenyẽ chõ nguia jẽ ae ae, i que Dios nandechiaorã mee mee nande je ra. Ûquĩ ndese nandeico bei quiatu nande ae ae. Dios que ñee nande je nyii, aque mosenda rã si bei chõ nandeico. Ûquĩ ño asenei senei nguiã Jesús quiato ishonda jaje abe.

¹⁸ —Echu serui, i mose Dios judío mo je, sã judío bei chõ ae riqui. —Echu serui, i mose Dios judío eã mo je, sã ae riqui judío raã naa eã.

¹⁹ Sebite judíos achõ, iã nda Dios. Sebite judíos eã achõ, iã nda Dios no. Ae Dios cheẽ mumbayãte quia nae, ùquĩ nguia Dios bite re.

²⁰ Eĩ nande que equia Dios ñee namo mose nande je nyii, aque mosenda rã mbei chõ nandeico.

²¹ Mbia rimba mose nde, Dios “eico serui” i mose ndeje, eico chõ erui. Mbia mo nimba raque nde. Erechãchĩ nda ndererecua si. Ndererecua huise mose ndesi, nde ae eico cote ae.

²² —Eico serui, i mose Dios mbia rimba mo je, Dios embui chõ nguia eicuã si cote. —Eico serui, i mose Dios emo ae siqui mose, Cristo rimba chõ aque cote re.

²³ Jesucristo que mano jẽje ra. Nyebe Jesucristo rimba ae chõ jẽingo nguia ùquĩ cote. Mbia rimba ae eã ño jẽingo nguia ùquĩ cote.

24 Dios que ñee nande je nyii, aque mosenda raanguia bei chõ nandeico Dios rese.

25 Nyucuaaque rĩ tacheẽ ndaque jẽje cote. Dios que ñee ãte seje ãquĩ nĩ nda. Se ae chõ tacheẽ jẽje. Airandu que Dios ia eã mose serese ra. Nyebe aico nguiã ñee ñooño eã tuchi jẽje co.

26 Sã mbia ngũinisiã mo ndea eã namo. Sã nyucuaaque ae riquichõ ngurã mo ndea rocoĩ. Mbia icuãte quiatu eriqui nguiã Jesús quiato je ã cote.

27 Neninisi mose, eico bei chõ erese erechayã mbei. Neninisiã mose, nde ae eico bei.

28 Neninisiã ndea mose, eicuã eã ño ãquĩ no nde. Nyucuaaque ngurã mo ndea mose, eicuã eã ño ãquĩ no nde. Mbae icuã nda eĩ eĩ ee ngurã ndea mose cote reae. Nyebe aico nguiã ñee jẽje. —Jẽ ae jẽingo jeninisiã, i jẽje.

29 Tacheẽ tuchi rã jẽje, Seresenda. Mbae ra ua jei ja nande je cote. Ae ngũinisi quereco quia, sã ãquĩ ndiqui ngũinisi rerequia eã naanguia.

30 Ae eya eãte riqui, sã ãquĩ ia tuchi raanguia riqui no. Ae eyate riqui, sã ãquĩ ia eãte raanguia riqui no. Ae mbae isi quia, sã ãquĩ ndiqui mbae isiã naanguia no.

31 ã nandeico rei nguiã íbii ã. ¡Ibi jenda rese ra nandendua tuchichĩ jẽ! ¡ã ibi jenda ja ra ua ja chõ jẽ!

32 —Jeninisiã ño jẽingo, ae que se ra. Jendua ndua eã jiri nda ibi jenda rese chã. Ae eninisiã, ãquĩ ndua ndua bei arõte Dios mi ndese. Ae Dios bite, ãquĩ esaã saã mbei arõte.

³³ Ae eninisi nae, ãquĩ ndua ndua bei arondete ibi jenda achõ ndese. Ae eninisi bite nae, ãquĩ esaã saã mbei arondete.

³⁴ Eĩ si chõ cuña no nde. Eru eã mose, ndua ndua arondete Dios achõ ndese. Ae Dios bite, ãquĩ nda esaã saã mbei ee. Siqui tuchi ra Dios rese. Ae ngu quereco nae, ãquĩ ndua ndua bei arondete ibi jenda achõ ndese. Ae eru bite nae, ãquĩ esaã saã mbei arõte. Siqui rocoĩ Dios rese.

³⁵ Jaendiquisã quisã eãte raque se jeninisirã mo ndea mose. Jemundua sacua Dios rese chõ aico nguiã ñee jẽje co. Jendua eã sacua mbae mo ndese chõ ñene. Jeninisi mose jendua bei aroneate Dios rese.

³⁶ —Seriirĩ ndu bite chĩ cote. Etiarõte chĩ cote, i mose amei mo, sã eriirĩ ngurã mo nderequia. Eicuã eã ño nguiirĩ ndurã mee ee re.

³⁷ —Sã seriirĩ ndu eã ae riqui. Erurã nda amee eã ee, i tuchi mose amei mo, eturãte ãquĩ abe.

³⁸ Ae nguiirĩ ndurã mo mee ee, eturã ño ãquĩ nde. Ae nguiirĩ ndurã mo mee eã ee, eturã tuchi chõ ãquĩ cote re.

³⁹ Eru mbae bei chõ eninisi re. Nyao aroneate nyesi. Eru mano mose, ngurã mo nderequia arõte Dios quiato mo cote.

⁴⁰ Eru mano mose, siqui turã arondete ngurã mo ndea eã mose cote. Eya tuchi ra siqui ngu eã mose reae. Se chõ acheẽ nguia ãquĩ ndeae. Espĩritu Turã abe sembucheẽ nguia reae.

8

Ae soo mbia mondo rei dios abareã je nae

1 —Mbia soo mondo mundo quia dios abareã je nae, ¿ũquĩ soo ra nandeu re? jenyee que seje. Ũquĩ tasenei jẽje cote. —Seaquiatute se, nande ja jate raque quia ã. Emo eaquiatu tuchi mose, ucuasu raã naa arondete. Emo nyesequa mose mbia rese, Dios abe rese ra nyesequa bei.

2 Seaquiatute se, i mose emo, eaquiatuã ño ũquĩ nde.

3 Emo nyesequa mose Dios rese, Dios ũquĩ icua chõ nguiã ũquĩ.

4 Mbia soo mondo mundo quia dios abareã je, ¿ũquĩ nda nandeu re? ¿Nandeu eã tuchi chõ nda re? Dios eã tuchi chõ dios abareã nde. Co mii tuchi chõ Dios re.

5 Dios abareã nguia etubiriãte re. Ibi jenda. Ibei riãnda abe no. Dios raanguia tubiriãte raque no.

6 Dios quia co mii tuchi nande je re. Ae quiarei nanderu tuchi. Ae mii ngue mbae chao ja tuchi ra. Ae mii ngue nandeaõ umbaerã nda. Nandererecua mii tuchi chõ siqui nguiã co no. Jesucristo, i equia ee. Ae que mbae chao ja tuchi Dios rese ra. Ae mii ño nandemingo nguiã ã.

7 Dios quiato mo iranuate quia ũquĩ ndese ã. Siquiche beite quiatu nguiã dios abareã si ũquĩ. Ae soo mbia mondo dios abareã je, ũquĩ mbaeiaeriqui reĩ nguiã ee. —¡Ũquĩ soo jẽu eã jẽ! i reĩ Dios nguiã ee.

8 Ae nandeu quia nae, ũquĩ nda nandembuturã eã Dios je. Nandechiu mo nda nandembuturã eã mingo. Nandechiurã nandeisi teã teã mose, ũquĩ nda nandembicuã eã no.

9 —¡Ũquĩ soo ra jẽuchi jẽ! iãte raque Dios nande je.

Mbaeiaie eãte raque ãquĩ soo. Mbaeiaie nda eriqui reĩ Jesús quiato namonda je raẽ. Jẽ eu mose, ãquĩ abe ra eu chee. —Mbaeiaie au chõchĩ, i ra ñimbicua tuchi cote.

¹⁰ Jẽquiaru mose dios abareã chuchua, Jesús quiato namonda ra mae jendese. ãquĩ abe ra soo u chee, ae mbia mondo Dios abareã je. Maende jendese. Eicua ndaque eriqui reĩ nguiã ee.

¹¹ Jẽ ndaque jẽirandu ãquĩ soo rese. Eicua eã ndaque eu mose. Jẽu eã ndei. Jẽ eu mose, Jesús quiato namonda abe ra eu chee. Siquichete raque esi. Eĩ jenye chõchĩ ãquĩ mbicha arõte Dios si. ãquĩ ñi abe chõ ngue Jesucristo mano nguiã.

¹² Soo mbaeiaie riqui reĩ mose ee, jẽu eã uquia ee ae. Jẽ euquia mose Cristo quiato namonda je, eicuate ãquĩ Cristo je.

¹³ Jesús quiato mo ambicua sereã tuchi chõ nguiã se. Se soo u mose, ãquĩ Jesús quiato mo mbicua mose, soo ra auã mbei cote.

9

Mbae mo jembu seje Dios cheẽ nenei nenei ndibishorõ, i ãte Pablo

¹ Jesús cheẽ nenei neneisa tuchi chõ se re. Sererecua mo eãte ibi jenda mo. Amae tuchi que Jesucristo rese se ra. Secheẽ nguire chõ jẽingo nguiã Jesucristo icua ãquĩ cote.

² Jesucristo cheẽ nenei neneisa eã ño co re, i arõte raque emo seje. Jẽ quiatu jeñee aroneate nguiã ãquĩ seje. ãquĩ jẽingo seicua tuchite ãquĩ. Secheẽ nguire quiatu que Jesús jẽicua cote resẽ.

³ Eĩ ae chõ nguiã ñee mbia ñee icua mose seje.

⁴ Se abe Jesús quiato sembuquiaru quiaru arondete raque.

⁵ Seninisirã Jesús quiato mo arao rao arondete raque mananguiti. Secuata cuata mose mbia mbiirandu randu Jesús riĩ. Sã Pedro riqui ngũinisi rerao rao no. Jesús nongue abe no. Sã Jesús cheẽ nenei neneisa ja ngũinisi rerao rao no.

⁶ ¿Se mĩ ño nda Jesús quiato sembuquiaru aroneate reĩ jêje re? Bernabé abe rese. Ure Jesús cheẽ nenei nenei mose.

⁷ Sã soldado siqui chooño eã comandante mbae mee eã mose ee. Sã emo ndiqui mbae tiquia chooñoa no. —Sechitiquia nda au chã, i chõ nguiã. Sã emo ndiqui ticuasu raarõ ñooñoa no. —Equiandi nda ambei chã, i chõ nguiã.

⁸ Secheẽ ae eã ño ũquĩ nde. Embesa ji chõ asenei nguiã jêje.

⁹ Co rei Moisés chimbesa co: Jẽ ticuasu mbuquiei quiei mose, echuru jemumbi eã.

Sã ae ae si quia mbae cua, i que embesa ji ra. Ticuasu achõ je eã ngue Dios ñee nguiã.

¹⁰ Nande abe je chõ ngue ñee nguiã. —Sã Jesús quiato abe riqui mbae mee mee echeẽ nenei neneisa je, i chõ ñene. Ae mbae chitiquia quia nae, “sechitiquia tau”, i chõ nguiã etiquia. Ae mbae a chiqui chiqui quia nae, “sechiqui tau”, i chõ nguiã eiqui iqui.

¹¹ Dios cheẽ ngue uremingue mingue tuchi quia jendese resẽ. ¿Jẽ urembuquiaru quiaru aroneate quia cote re? ¿Ureiraorã jemee aroneate quia ure je cote re?

12 Mbae mo jemee mee nguia Jesús cheẽ nenei neneisa mo je ùquĩ. ¿Mbaerã jẽingo emee eã ure abe je quiatu re? —¡Mbae mo nandeisi teã eo si jẽ! ure que equia oso mose jendea ra. Dios si jembũcha eã sacua ño ngue mbae mo ureisi teã nguia jẽsi.

13 Sã Dios ñee sacerdotes je cose no. —Ae siqui quia sechuchua sacrificio raã naa nae, sã ùquĩ ndiqui ofrenda u u bei ae, i que Dios ñee cose ra.

14 Eĩ si chõ ngue Jesús ñee nguia ucheẽ nenei neneisa je. —Ae secheẽ turã senei senei nguia nae, sã sequiata ataque riqui mbae mee mee mbei ùquĩ je, i que Jesús ra.

15 Dios cheẽ nenei neneisa tuchi raque se. Mbae mo ngue aisi chõ ãte jẽsi ra. Se ae chõ mbae achao chao nguia sembaerã co. —Mbae mo jemee seje, ae ãte chõ nguia co mbesa mbesa jẽje co. Tamano ae, “mbae embu seje”, i rocoĩ jẽje.

16 Dios cheẽ nenei neneisa tuchi chõ se re. Ùquĩ ni seturã asaã saã aroneate. —Secheẽ esenei senei mbia je, i quiatu Dios nguia seje. Se erenei nenei eã mose mbia je, Dios ra paama i seje.

17 Se ae que andua eã nda. —Dios cheẽ tasenei senei, aeã ngue se ae ra. Dios chõ ngue ñee nguia seje. —Secheẽ esenei senei mbia je, i nguia seje. Se ae andua mose, eĩ nda Dios mbae mo mee ndei seje ucheẽ nenei nenei ndibishorõ. Dios rimbate quia se re.

18 ¿Mbae chõ sebite riqui chã? Mbae mo isiã Dios cheẽ nenei nenei ndibishorõ, ùquĩ ño sebi re. —Mbae mo embu seje Dios cheẽ nenei nenei ndibishorõ, ae ãte quia co. Ùquĩ nguia sebi re.

19 Mbia mo nimba eã ndaque se. Mbia rimba

asaã saã ño nguiã Dios cheẽ nenei nenei mbia je co. Mbia Jesucristo icua sacuaã.

²⁰ Seico mose judíos ite re, judío asaã saã ño nguiã. Judíos Jesucristo icua sacuaã. Ae siqui tuchi quia Moisés chimbese rui nae, ñquĩ ite re seico mose, Moisés chimbese asaã saã ño nguiã se abe. Ñquĩ Jesucristo icua sacuaã. —Moisés chimbese rui eico, i ãte raque Dios seje.

²¹ Ae siquiã nguia Moisés chimbese cheẽ ndui nae, ñquĩ ite re seico mose, se abe Moisés chimbese asaã saã eã ño nguiã cote. Ñquĩ Jesucristo icua sacuaã. Cristo mi ñee ño amumba mumbayã nguia co.

²² Jesús quiato quirãcuã nea ite re seico mose, ñquĩ asaã saã ño nguiã se abe, sequirãcuã nea naa naa. Ñquĩ Jesucristo icua sacuaã. Ae ite re aico oso oso beite nae, ñquĩ na ño aico nguia se abe. Ñquĩ Jesucristo icua sacuaã.

²³ Ñquĩ ja chõ asaã saã nguiã Dios cheẽ turã ni co. Nandeico turã ja sacuaã Jesús rese.

²⁴ Sã mbia carrera raã naa no. Mbia ja chõ uchã ndaque. Co mi ño nda premio isi. Aque rã tuchi chõ jẽingo Jesús rese. Premio isi sacuaã naanguia.

²⁵ Ae ra carrera saã saã nae, ñquĩ mbae icua secha ja chõ nguiã ñquĩ. Premio isi sacuaã ño eriqui nguia mbae icua naa eã. Premio nda ua jei raque. Ae Jesús mee arõte quia nande je premio nae, ñquĩ nguia ra ua eã mbei nandesi.

²⁶ Se aico choõña nguia Jesús rese co. Jesús rese aico turã tuchi chõ nguiã se co.

²⁷ Mbae asaã saã ño nguiã serete mbirãcuã co. Serete secheẽ mumbayã sacuaã. Se premio ganar

i sacuaã ño aico nguiã eraã naa co. Premio isiã sebiãte, se Dios cheẽ nenei nenei tuchiẽ. Nyebe aico nguiã siqui tuchi Jesús rese co.

10

Dios raanguia rese ra jẽingochĩ jẽ

¹ ¡Jẽtesareichĩ nda nandei ñiinda si jẽ! ¡Moisés mosenda si jẽ! ¡Ûquĩ ngue siqui ja rei ibeishĩ ndui ra jẽ! ¡Ûquĩ ngue nyoi ja rei Ama Ireĩ ndasa Dios ñee mose ee ra jẽ!

² —Moisés rese nandeico bei, i ja rei que mbia siqui ja mose ibeishĩ ndui ra. —Moisés rese nandeico bei, i ja rei que mbia Ama Ireĩ ndasa mose ra.

³ Ae Dios mee ndei ee echĩurã nae, ãquĩ ngue mbia ja u u rei ra.

⁴ Ae Dios mee ndei ee embei sacuaã nae, ãquĩ ngue mbia ja mbei mbei rei ra. I que tuutu quia sita si nae, ãquĩ ngue mbia ja mbei mbei rei ra. Aque sita rei Cristo rã. Cristo que siqui tuchi quia ãquĩ mbia rese ra.

⁵ Ûquĩ ataque rese que Dios ia eã tuchi riqui ra. Siqui turã eã tuchi que equia Dios rui ra. Nyebe Dios eataque iquia iquia nguiã turúquiaa.

⁶ Nandemundua sacuaã ño ãquĩ nde. Mbae icuaã osei osei eã sacuaã nande chõ ãquĩ nde. Sã ãquĩ mbae icuaã osei osei no.

⁷ Jẽingochĩ nda dios abareã ndese. Sã ãquĩ ndiqui dios abareã ndese no. Sã embesa ji riqui ñee no: “Mbia que quiaru quiaru ra. Mbae abe que embei mbei ra. Aquere que nyuruqui ruqui

ticuasu raanguia je ra”, i que embesa ji ra. Jẽ nguia jẽingo eã dios abareã ndese.

⁸ Ûquĩ nandei que siqui siqui ngũinisiã ndese no nda. Nyebe Dios eiquia iquia tuchi nguiã. Veintitrés mil que mano aque nyaashĩ mose ra. ¡Mbae icuã nda nandesaã saãchĩ ùquĩ na jẽ!

⁹ —Ma Cristo roseĩte, nandechĩ nda mbae icuã naa jẽ. Sã nandei riqui “ma Dios roseĩte” i nyii no. Sã ñi ngue eriqui mbae icuã naa mbei cose no. Sã mbei tásie riqui eiquia iquia no. ¡Ûquĩ nandesaã saã eã tuchi chõ nguia nande jẽ!

¹⁰ ¡Jeñee icuã icuãchĩ nda Dios rĩ jẽ! Sã ùquĩ nandei ñee icuã icuã nguia Dios rĩ no. Nyebe ángel nandei ñiinda iquia iquia tuchi nguiã.

¹¹ Eĩ si tuchi que nandei ñiinda quia nyii ra. Dios que embesa mi nandetesarei eã sacuã nda. Mbae ua ja serĩ mose chõ Dios riqui nguiã nandembesarei eã co.

¹² —Sequirãcuã tuchi chõ se re, i mose emo, ¡sã aque riqui nyicua tuchi quiatu jẽ! Mbae icuã jẽ nonde ee.

¹³ —¡Mbae icuã esaã jẽ! i mose diablo jẽje, eĩ si chõ nguiã ñee mbia ataque je. Jẽ mi je eã. Dios quia ra ucheẽ mbuchebiã mbei. Jendeaquiato bei ra diablo ñee mose jẽje. Jembirãcuã ndae. Jẽ “nya” i sacuã mbae icuã je.

¹⁴ Seresenda, ¡dios raanguia rese ra jẽingochĩ jẽ!

¹⁵ Jẽaracuate rei jẽ ndesẽ. Secheẽ ndese jemae quiatu. ¿Acheẽ ñooño se re? Acheẽ ñooño eã se reae. Jẽtea quiatu.

¹⁶ Nande Santa Cena naa naa mose, Cristo ruqui mbei raanguia chõ nandeico nguiã uva rique mbei

mbei. —Cristo ruqui nandembitirõ ja beĩ quia ã, i chõ nguiã uva rique mbei mbei. Mbichae nandesiquio quio quia eu nonde nae, Cristo roo rã ño ãquĩ nde. —Cristo roo nandembitirõ ja beĩ quia ã, i chõ nguiã mbichae u u.

¹⁷ Nandetubiriãte raque Jesús quiato. Nande ja chõ aque mbichae mi nandeu ja nguiã. Mbae mi na nguiatu nandeco nguiã nande ja ã.

¹⁸ Judíos rese chõ jendua. ãquĩ sacrificio raã naa mose, sacrificio eu chõ nguiã ã. —Dios resete quia nandeco nguiã ã, i equia ã.

¹⁹ —Dios abareã mbae mo saã arondete, ae ãte raque quia co. Ae soo mbia mondo mondo quia dios abareã je, soo chõ ndaque ãquĩ.

²⁰ Mbia soo mondo mondo mose dios abareã je, Dios tuchi je eã ño eriqui nguiã emee mee. Aba checuayã icuã je chõ eriqui nguiã emee mee. ¡Aba checuayã icuã ndese ra jẽingo jiri jirichĩ jẽ!

²¹ Jẽ mbae mbei mose aba checuayã ndese, Jesús ruqui mbei raanguia jẽsaã aronea ño nguiã cote. Jẽquiaru quiaru mose aba checuayã nyuchua, Santa Cena jesaã aronea ño nguiã cote.

²² ¿Mbaerã jẽingo Jesucristo mbupaama ite re? ¿Jẽquirãcuã tuchi chõ eriqui esi jẽ nde?

Jesús quiato ataque rese quia jẽingo ndua

²³ —Ae soo mbia mee mee nguia dios abareã je nae, ãquĩ ndese ra jẽocochĩ, i ãte raque Dios nande je. Dios biãte nande mbae raã ja chooño mose. ãquĩ ni Dios ñee ãte raque nande je. Nande ae chõ nandecua. Mbae mo Jesús quiato mo mundua icuã mose, ãquĩ si nandehui chõ.

24 —Nande ae nandeico Dios rese, jenyechĩ nda jẽ. —Mbia ja quiatu nandemingo erese, jenye quiatu.

25 Soo jẽisichõ ño nguia mbae vender ísaa. —¿Dios abareã je co soo jemondo nyii re? jjenye chĩ nda ñee ee jẽ! Jẽiranua mose, mbaeia eã ño soo jẽje cote re. Jẽisichõ ño nguia jẽiranua.

26 Jesucristo mbae chõ ibi re. Mbae ibi jenda ja abe rei embae no. Ae Jesucristo chao ja nae, ùquĩ ndei nandechiurã ja.

27 —Nyao rã quiaru serese, i mose emo jẽje, jẽso chõ quiaru erese jẽsose mose. Ae ra echara mondo jẽje, jẽuchõ ño. —¿Co mbia mondo dios abareã je nyii re? jenyechĩ nda ee. Jẽiranua mose, mbaeia eã ño jẽje cote re. Jẽiranua ño jẽquiaru.

28 —Co soo que mbia mondo dios abareã je ra, i mose emo jẽje, jẽu eã ño cote. Ae ñee jẽje nae, aque mbiicuã eã sacua ño jẽu eã. Aque soo jẽu eã cote, jẽirandu mose erese. Jẽ eu mose, Jesús quiato ra ndua icuã icuã cote.

29 Jendua icuã eã ndaque jẽ. Emo nguia ndua icuã arõte nguã cote, jirandu mose jẽ eu rese. —¿Mbaerã nda aque soo au eã sebi mose re? i arõte jemo seje. —¿Mbaerã nda emo ñee amumbayã nde? i arõte jemo seje.

30 —Se “gracias” i mose Dios je aque soo u nonde, eicuã eã ño cote reae. ¿Mbaerã nda emo ñee icuã seje re? i arõte jemo seje. —¿Mbaerã nda au eã eicuã eã mose re? i arõte jemo seje.

31 ã ndese chõ jendua. Ae nandesã saã nguia nae, Dios je chõ nandesã. Ae nandeu ndeu quia mbae nae, Dios je chõ nandeu. Ae nandembei

mbei quia mbae nae, Dios je chõ nandembei no. Mbia ra ñee turã Dios je, nandeico turã mose.

³² ¡Mbia ra jemundua ata atate chĩ jẽ! —Ã icuã ereae, i mose emo jẽje, ¡ũquĩ nda jẽsaãchĩ jẽ! Jẽ eraã mose, ũquĩ nda ndua icuã Jesús rese cote. Judíos. Judíos eã abe. Jesús quiato abe. Ũquĩ ndua icuã arõ Dios rese, jẽ eraã mose.

³³ —Se ae taico Dios rese, ae ãte quia co. —Mbia ja quiatu tamingo erese, ae quia co. Dios mbia rirõ sacua eicuã si. Mbia siqui bei sacua Dios rese.

11

¹ Se rã si chõ jẽingo. Sã aico Cristo rã si se no.

Eĩ jenye chõ nguia u ñumunua nua mose, i Pablo cuña je

² Acheẽ turãte quia jeni co. Jendua beite quiatu quia serese. Acheẽ ngue jẽje nyii, ũquĩ jemumbayã mbeite quia secheẽ ũquĩ.

³ Ae ra ambesa jẽje namo, ¡ũquĩ jẽicua tuchi quiatu jẽ! Cristo rei hombre ja rerecua. Hombre rei ngũinisi rerecua no. Sã Dios Cristo rerecua no.

⁴ Mbia ñumunua mose, sã hombre mo ñee eã Dios je huiite sucha resebe. Sã eãquĩ nyecua chõ siqui Dios cheẽ nenei nenei. Uãquĩ ati mose, aba ireĩte ũquĩ.

⁵ Mbia ñumunua mose, sã cuña mo ñee eã Dios je huiite suchayã. Sã cuña aãquĩ ati ji chõ siqui Dios cheẽ nenei nenei. Cuña uãquĩ ati eã mose, aba ireĩte ũquĩ. Uãquĩ huĩ na ño eriqui nguiã uãquĩ ati eã no.

6 Cuña mo uãquĩ ati sereã mose, sã uãquĩ huĩ tuchi quiatu no. Eireĩ mose uãquĩ huĩ, sã uãquĩ ati quiatu ua sia rocõĩ no.

7 Hombre mo nguia uãquĩ chati aroneate nguia Dios cheẽ nenei nenei. Dios quiatu ngue hombre chao nguia umbaerã. Aquere que cuña mo ao hombre mbaerã cote ra.

8 Cuña ndoquieĩ je eã ño ngue Dios hombre ao nguia. Hombre roquieĩ je quiatu ngue Dios cuña mo ao nguia.

9 Cuña chirecorã eã ño ngue Dios hombre ao nguia. Hombre chirecorã nguia tu ngue Dios cuña ao nguia.

10 Nyebe ra cuña uãquĩ ati quiatu. —Seru chõ sererecua re, i chõ nguia uãquĩ ati. Angeles quia maete nguia erese.

11 Jesucristo quiato ja chõ nande re. Hombre achõ nda siqui turã eã cuña eã mose. Cuña achõ nda siqui turã eã hombre eã mose no.

12 Hombre roquieĩ je chõ ngue Dios cuña ao rei nguia nyii. Cuña abe riqui tiirĩ irĩ hombre co cote. Dios chiao ja chõ ñene. Cuña. Hombre abe.

13 Jẽ ae chõ jendua mae erese. Eicuãte cuña ãquĩ ati iriã ñee Dios je.

14 Hombre a boco mo siqui mose, aba ireĩte ãquĩ. —Eicuãte ãquĩ, i ja tuchi mbiamo ñooñoa nguia ãquĩ je ã.

15 Cuña mo nguia tu ea boco siqui mose, ãquĩ nguia earõte re. Ea boco que Dios mee ee ra. Eãquĩ ati sacua.

16 —Cuña a boco sebiã, i mose jemo, sã ndua chõ Jesús quiato ataque rese. —Sã cuña a boco

riquichõ, i ja chõ Jesús quiato nguiã serese ùqui.

Jenyao chaochĩ nda Santa Cena u mose jẽ

17 —Santa Cena naa icuã icuã ño ngue equia ñumunua nua nda, i que mbia mo sembiirandu jeni nda. Nyebe seya eãte riqui nguiã jendese.

18 —Hue rĩ ja eã eriqui ndua ndua ñumunua nua mose ùqui, i que emo sembiirandu jeni nda. —Ichõñõ eã ereae, ae sequia ndua ndua co.

19 Jeñimbuchao chao chõchĩ equia ùqui. Mbia Jesús quiato tuchi icua sacua ño jeñimbuchao chao nguiã.

20 Santa Cena naa naa mose, abei chiã tuchi chõ jẽingo nguiã jenyue ùqui. Eĩ eã tuchi que Jesucristo nandembaaquiato ra.

21 —Se rane sembae tau ja, jenye jaaja chõchĩ nguiã Santa Cena naa naa ùqui. Mbae mee ndocõĩ emo je. Nyebe mbaecha riqui nguiã quiaru tuchi. Mbae mbei tuchi no. Mbaecha reã niacuã mose.

22 Jẽquiaru tuchi mose Santa Cena, jẽingo icuã ño nguiã Jesús quiato ataque je ùqui. Mbaecha reã ireĩ ireĩ ño nguiã jẽsi ùqui. ¿Mañi ae ra ñee jẽje re? Eicuãte ùqui ndesẽ. Jenyuchua ae ae rei jẽquiaru sacua ndesẽ.

Jesús quiaru mose uchĩmbaaquiato rese

23 Jesucristo ae sí que sembaaquiato ra. Ñ ngue asenei ndei jẽje nyii resẽ: Judas Jesucristo reacuquia nonde mbia icuã je, aque isa sí que Jesucristo mbichae sirõ nda.

24 Gracias, i que ñee Dios je cote ra. Mbichae que esiquio uchĩmbaaquiato je cote ra. —¡Co jẽ! Jẽu. Serete rã ño mbichae riquio ji co re. Jeni ño nda

serete riquio ji cote. Co jẽu mose, jendua ndua bei quia serese, i que Jesús mbichae mondo ee ra.

²⁵ Quiaru jare que Jesús eyuquia rirõ cote ra. Ñee ngue uchimbaaquiatu je cote ra. —Seruqui rã ño uva rique co re. Mbia icuã mbutiã sacuã tuchi chõ seruqui re. Dios cheẽ yasu rui si chõ seruqui riqui nguiã mbia icuã mbutiã co. Co mbei mbei mose, jendua ndua bei quia serese, i que Jesús ee ra.

²⁶ Jẽ co mbichae u mose, jẽ uva rique mbei mose, Santa Cena, i chõ nguiã ùquĩ je. Jẽ Santa Cena naa naa mose, Jesucristo mano nenei nenei ño nguiã mbia je ùquĩ. Santa Cena jẽsaã saã mbei quia Jesucristo tu mose chee.

Jendua tuchi Jesús rete rese Santa Cena u mose

²⁷ Emo Santa Cena naa icuã icuã mose, ùquĩ siqui icuã icuã ño nguiã Jesucristo rete je ùquĩ. Ùquĩ siqui icuã icuã ño nguiã Jesucristo ruqui je ùquĩ no.

²⁸ Nyebe nandendua ndua tuchi quiatu quia Santa Cena naa nonde.

²⁹ Emo Santa Cena naa icuã icuã mose, emo ndua eã mose Jesucristo rete rese, ùquĩ nda Dios mbasi.

³⁰ Ùquĩ je chõ jendasi rasi bei riqui nguiã. Ùquĩ je chõ jẽingo nguiã mano mano tuchi.

³¹ Nande ae nandereco nandeicua jiri ae. Eĩ nda Dios nandembasiã cote.

³² Jesucristo nandembasi mose, nandemundua sacuã ño ùquĩ nde. Nandembtirõ sacuã ño cote re. Dios nandemombo eã sacuã tata cuasu chõ ùquĩ nde. Jesús quiatoã mombo mose tata cuasu.

³³ Nyebe aico nguiã ñee nyecua jêje co. Jê Santa Cena naa naa mose, jeñumunua nua turã ño. Jêingo turã ño jenyue. Jenyisaarõ turã ja chõ Santa Cena u nonde.

³⁴ Jemo niacuã siqui mose, sã quiaru uchuchua, Santa Cena naa nonde. Eĩ jenye mose, Dios ra siqui turã jêje cote, jeñumunua nua mose. Seso mose jendea ra secheẽ ataque asenei jêje cote.

12

Espíritu Turã ño nandechisaã saã sacua mondo nguiã nande ae ae je

¹ Espíritu Turã ngue mbae mee jaaja nande ae ae je ra. —Co esaã nde, co rese eico nde, i jaaja que nande je ra. Ûquĩ ndese taembiirandu cote.

² Dios abareã ndese que jêingo tuchi nyii ra. Mbia que jemingo tuchi dios abareã tubiriã ndese nyii ra. Dios abareã aba cheẽ andu aroneãte. Ûquĩ jêingo Jesucristo rese ùquĩ cote.

³ ã ndese jendua tuchi: —Jesús icuãte riqui Dios je co, i mose emo, echeẽ ae chõ ùquĩ nde. Espíritu Turã embucheẽ eã ño nguiã ùquĩ. —Jesús rei Dios tuchi, i mose emo, echeẽ ae eã ño ùquĩ nde. Espíritu Turã ño embucheẽ nguiã ùquĩ.

⁴⁻⁶ —Co esaã nde, co rese eico nde, i jaaja que Dios nande ae ae je ra. Espíritu Turã mii ño siqui bei nguiã nande ja rese co. Jesucristo mii ño siqui nguiã nanderese co. Jesucristo mo eãte emo. Dios mii ño siqui nguiã nandembuquirãcuã co no. Dios mo eãte emo.

⁷ Espíritu Turã uquirãcuã teacuquia chõ nguiã nande ae ae je co. Nandeico turã ja tuchi sacuã Dios rese.

⁸ Espíritu Turã mii ño siqui nguiã co. Hue rĩ ja eã ño eriqui nguiã uquirãcuã mee nande je. —Nde ra erecheẽ aracua bei quia, i chõ nguiã nandemo je. —Nde ra mbia erembaaquiatu turã mbei quia, i chõ nguiã nandemo je no.

⁹ —Jesucristo ra ereicua tuchi quia nde, i chõ nguiã nandemo je co no. —Mbia rasi ra erembucherõ cherõ mbei quia nde, i chõ nguiã nandemo je co no.

¹⁰ —Mbia mae sayã nda eresaã saã mbei quia nde, i chõ nguiã nandemo je co no. —Dios cheẽ nda eresenei senei tuchi quia mbia je nde, i chõ nguiã nandemo je co no. —Espíritu eicua icua bei quia nde. Etura icua. Eicuaã abe icua no, i chõ nguiã nandemo je co no. —Mbiamo ñee esaã saã tuchi quia nde. Mbia cheẽ chumumbara, i chõ nguiã nandemo je co no. —Mbia cheẽ mo eicua icua quia mbia je, i chõ nguiã nandemo je co no.

¹¹ Eĩ ño Espíritu Turã mii nguiã ucheẽ mbuchao chao nande je co. Nandechisaã saã sacuã mee mee nande ae ae je co. Eĩ ño Espíritu Turã mii nguiã uquirãcuã mbuchao chao nande je co no. —Co esaã nde, co esaã nde no, i chõ nguiã nande ae ae je co.

Mbae mii na ño nandeico nguiã nande ja

¹² Jesús rete rã ño nandeico nguiã nande ã. Nande tubiriãte raque Jesús quiato. Sã aba rete resenda tubiriãte no. Eresa. Eri. Eo. Erete mii ndaque. Eĩ ño nande no nde. Jesús rete mii na.

¹³ Jesús rete rã ja chõ nande re. Erete mii na ño nande ja re. Judíos mo ño nandeico nguiã nande ã. Judíos eã abe mo ño nandeico nguiã ã no. Mbia rimba mo abe abe nandeico ã no. Mbia rimba eã mo abe abe nandeico ã no. Mbae mii na ño nandeico nguiã Jesús quiato ja ã. Erete mii na. Eĩ ño Espíritu Turã mii nguiã nandemingo ã.

¹⁴ Nanderete mii ae siqui ãte. Nanderete resenda tubiriãte riqui ã.

¹⁵ Nandei achõ ñee aroneate. —Eo eã ñochĩ se. Nyebe erete resenda eã se re, i aroneate nandei ñee. Nanderete resenda bei chõ nandei re.

¹⁶ Nandeisa achõ ñee aroneate. —Eresa eã ñochĩ se. Nyebe erete resenda eã se re, i aroneate nandeisa ñee. Nanderete resenda bei chõ nandeisa re.

¹⁷ Nanderesa achõ mose nanderete resenda, i nda nandeico rei mbae anuate co. Nandeisa achõ mose nanderete resenda, i nda nandeico rei mbae retõ ãte co.

¹⁸ Dios ae que nanderete resenda mii ja ja cose ra. —Co tamii a, co abe tamii a no, i jaaja que nanderete resenda mii mii nda.

¹⁹ Nanderete resenda mii mose, eĩ ndei ra nanderete eãte.

²⁰ Nanderete resenda ja que Dios mee nande je ra. Nanderete resenda tubiriãte raque. Nanderete mii tuchi chõ ñene.

²¹ —Arerecoã nda se, i aroneate nanderesa ñee nandeo je. —Arerecoã nda se, i aroneate nandẽquĩ nandei je no.

²² Ae nanderete resenda ñetẽ tuchi nae, ae nanderete resenda quirãcuã nea tuchi nae, ãquĩ nguiarei nandechireco tuchi.

²³ Ae nanderete resenda aba ireĩte nae, ãquĩ nandetea quiatu chõ nguiã. Nandechati turã ño

nguiã.

²⁴ Ae nanderete resenda checuate riqui nae, ãquĩ nguiatu nandechatiã nguiã. Dios que nanderete resenda saã turã ja ra. Ae nanderete resenda aba ireĩte nae, ãquĩ quiatu aba queteambare.

²⁵ Nyebe nanderete resenda riqui nguiã ñee aroneate nanderete resenda nongue je. — Arerecoã nda se, i aroneate ee. Nyebe nanderete resenda riqui nguiã siqui turã ja nyiese.

²⁶ Nanderete resenda mo ndasi mose, nanderete mbasi ja chõ nguiã. Nande ñee turã mose nanderete resenda mo je, nanderete ia ja tuchi ra erese.

²⁷ ã ño secheẽ tuchi ã nde: Cristo rete rã ño nandeico ja nguiã nande ã. Cristo rete resenda rã ja chõ nandeico nguiã nande ae ae ã.

²⁸ —Co esaã nde, co rese eico nde, i jaaja chõ Dios nguiã iglesia jenda uquiato je ã. —Cristo chimbaaquiato tuchi chõ nde re, i chõ nguiã emo je. —Secheẽ nenei neneisa chõ nde re, i chõ nguiã emo je no. —Mbia mbaaquiatusa chõ nde re, i chõ nguiã emo je no. —Mbia mae sayã esaã saã nguia nde, i chõ nguiã emo je no. —Mbia rasi embucherõ cherõ nguia nde, i chõ nguiã emo je no. —Ayudante eico nde, i chõ nguiã emo je no. —Iglesia rerecuarã nde, i chõ nguiã emo je no. —Mbia cheemo esaã saã nguia nde, i chõ nguiã emo je no.

²⁹ Cristo chimbaaquiato ja eã ño nande re. Dios cheẽ nenei neneisa ja eã ño nande no nde. Mbia mbaaquiatusa ja eã ño nande no nde. Mbia mae sayã naa naasa ja eã ño nande no nde.

³⁰ Mbia rasi mbucherõ cherõsa ja eã ño nande no nde. Mbia cheemo naa naasa ja eã ño nande no nde. Mbia cheemo mbiasa asasa ja eã ño nande no nde.

³¹ Nandechẽ ño Dios je. —Ndequirãcuã emee na seje. Ae je erecheẽ ñee ure je, eĩ nda ãquĩ mo asaã saã se abe, nande quia ñee Dios je. Mbae turã tuchi mo tasenei na jẽje.

13

Nandechesecua eã mose, Dios chirirõ ño nandre

¹ Se nyesecua eã mose mbia rese, secheẽ iru iru beite ra eriqui. Mbia cheẽ nda aicua ja raque. Angeles cheẽ abe ra aicua raque no.

² Se nyesecua eã mose mbia rese, mbae turã mo naasa eã ño se re. Dios cheẽ nda ambuchecua checua tuchi raque. Se ra mbae aicua ja raque. Se ra Dios aicua tuchi raque. Ibi ibate mo nda arusuri raque Dios quirãcuã je.

³ Se nyesecua eã mose mbia rese, aico chooño mbei chõ nda se. Sembae ra amee ja raque mbia mbaecha reã je. Mbia ra serei raque, se Dios cheẽ nenei nenei mose.

⁴ Ae nyesecuate quia mbia rese nae, ãquĩ nguia siqui minguate nguia mbia je ã. ãquĩ nguia eturãte riqui nguia mbia je co. ãquĩ nguia mae icuã icuã eãte nguia emo mbae rese ã. ãquĩ nguia “seaquiatu tuchite se”, iãte nguia co.

⁵ Ae nyesecua quia mbia rese nae, ãquĩ nguia “se quiatu”, iãte nguia mbae mo je. Ae aba ireite nae, ãquĩ mo esaã saã eãte quia co. Ae nyesecua quia mbia rese nae, ãquĩ nguia paama i jei jei eãte nguia

ã. Ũquĩ nguia ndua icuã icuã eãte nguĩã emo icuã mose ee ã.

⁶ Ae nyesequa quia mbia rese nae, ũquĩ nguia eya eãte riqui nguĩã, emo mbae icuã naa mose ã. Emo mbae turã naa mose quia eyate riqui nguĩã ã.

⁷ Ae nyesequa quia mbia rese nae, ũquĩ ñĩmbirãcuã ño nguĩã mbae ja je ã. —Ihchõĩño nguĩã, iã ño nguĩã mbia cheẽ je. Siqui tochi chõ nguĩã.

⁸ Dios quiato ra nyesequa bei mbia rese, mbae ua ja chee. Dios cheẽ nda nandesenei senei eã emo mose cote. Mbia cheẽ ata mo nda nandesã eã emo mose cote. Mbia mbaaquiatusa mo eã nda emo mose cote. Ũquĩ nda ua ja chee. Dios quiato quiatu ra nyesequa bei quia.

⁹⁻¹⁰ Mbae mii mii ño nandeicua icua nguĩã namo ã. Jesús tu mose quia ra mbae mii nandeicua eã cote. Dios cheẽ miiite nandesenei senei nguia namo ã. Jesús tu mose quia ra mbae nandeicua ja cote.

¹¹ Señetẽ mose que aico ñee ñee mbia riirĩ na nda. Mbia riirĩ na ño ngue aico ndua ndua señetẽ mose ra. Mbae que aicua icua chõ nguia mbia riirĩ na no nda. Secuasú mose que señetẽ mosenda asecha ja cote ra.

¹² Mbae cuu rese mae naanguia chõ nandeico nguĩã mae namo. Jesús tu mose quiatu ra mbae chequa ja nande je cote. Mbae mii mii ño aicua icua nguĩã namo co. Jesús tu mose quia ra mbae aicua ja cote.

¹³ ã nandeico Dios icuate ã. ã nandeico Jesu-cristo ru raarõ arõ ã. ã nandeico nyesequa jate mbia rese ã. Nandechesequa mose quiarei, ũquĩ

eturã tuchi mbae ja si.

14

Mbiamo cheẽ naa naa mose

¹ ¡Jenyese cuase tuchi quiatu quia mbia rese jẽ! Jeñee ño nguia Dios je. —Paba, ndequirãcuã emee na seje. Mbae raã naa sacuaã ndeje, jenye bei chõ nguia Dios je. —Ndecheẽ asenei senei sete ndequirãcuã je, jenye chõ nguia ee.

² Jesús quiato mo mbiamo cheẽ naa naa mose, mbia ra eicuayã jate. Dios miñ ño nda eicua nguia. Dios miñ je chõ eriqui nguia ñee. Uchue si chõ eriqui nguia ñee. Mbia quia echeẽ icuayãte nguia.

³ Ae Dios cheẽ senei senei nguia, ñquĩ nguia ñee nyecuate nguia mbia je. Ñquĩ nguia mbia mbaaracua turãte nguia Jesucristo riñ. Ñquĩ nguia mbia mingo uquia tuchi nguia Jesucristo rese no. Ñquĩ nguia mbia mbia tuchi nguia Jesucristo rese no.

⁴ Ae mbiamo cheẽ saã saã nguia nae, mbia mingo uquia reã ño nguia Jesucristo rese. Ae ae umingo uquia nguia erese. Ae Dios cheẽ senei senei nguia nae, ñquĩ nguia Jesús quiato mingo uquiate nguia Jesús rese.

⁵ Mbiamo cheẽ nda jẽsaã aquiatu ja raquete seje chã. Dios cheẽ nenei nenei aquiatu mose, ñquĩ nguia eturã tuchi re. Ñquĩ nguia eturã tuchi mbiamo cheẽ naa naa si re. Ae mbiamo cheẽ saã saã nguia nae, aque ucheẽ mbiasa mose Jesús quiato je, eturã ño ñquĩ no nde. Jesús quiato mingo uquia chõ nguia Jesús rese ñquĩ.

⁶ Se mbiamo cheẽ naa naa mose jẽje, ãquĩ nda jemingo uquia reãte Dios rese. Se ñee nyecua mose jẽje, ãquĩ nguia eturãte re. Ae rese Dios sembiirandu nae, ãquĩ nenei nenei mose jẽje, ãquĩ nguia eturãte re. Se Dios cheẽ mbuchecua tuchi mose jẽje, ãquĩ nguia eturãte no nde. Se Dios cheẽ icua icua tuchi mose jẽje, ãquĩ nguia eturãte no nde. Mbiamo cheẽ naa naa si.

⁷ Sã música no. Emo flauta mbucheẽ icuã icuã mose, mbia ra tonada icuayãte. Emo guitarra mbucheẽ icuã icuã mose, mbia ra tonada icuayã no.

⁸ Sã soldados no. Emo corneta mbucheẽ icuã icuã mose, soldados ra icoquiatuã.

⁹ Eĩ si chõ jẽ no nde. Jẽ mbiamo cheẽ naa naa mose, mbia ra jeñee icuayãte. Jẽ mbiamo cheẽ naa naa mose, mbia eãsa ñee ñee na ño ãquĩ nde.

¹⁰ Mbiam cheẽ ñumumbarate eriqui rei. Ucheẽ ae raã naa mose, echecuate ee.

¹¹ Emo ucheẽ naa naa mose seje, se eicuayã mose, mbiamo ño aico nguiã ee. Mbiamo ño ae riqui nguiã seje no.

¹² Espíritu Turã quirãcuã jenyosei tuchi quia reae. Coche tuchi chõ ãquĩ nde. Jesús quiato mingo tuchi sacuã Jesús rese chõ equirãcuã jenyosei jẽ.

¹³ Nde mbiamo cheẽ naa naa mose Jesús quiato je, echeẽ na Dios je. —Paba, ndequirãcuã emee na seje. Secheẽ mbiasa sacuã mbia je, ere chõ Dios je.

¹⁴ Se mbiamo cheẽ naa mose Dios je, acheẽ ñee ndaque Dios je. Mañi ae quiatu ñi se quia ñee ee.

¹⁵ Mbiamo cheẽ abe ra asaã saã ndaque Dios je. Secheẽ abe ra asaã saã ee no. Mbiam secheẽ icua ja sacuã. Mbiamo cheẽ abe ra asaã saã se irasei rasei

mose. Secheẽ abe ra asaã saã se irasei rasei mose no.

¹⁶ Nde mbiamo cheẽ naa naa mose Dios je, mbia ra ndecheẽ icuayãte. Ae eaquiatsuãte, ãquĩ nda ndecheẽ icuayãte. Nyebe eriqui nguiã ñee aroneate Dios je nderese. Nyebe nandecheẽ sí chõ nandesã Dios je.

¹⁷ Coche jẽingo nguiã ñee Dios je. Jeñee sí quia nda aba saã Dios je re. Jẽ mbiamo cheẽ naa naa mose ee, jendesenda quia nda jeñee icuayãte nguiã. ãquĩ mose ra jendesenda jemingo uquia reãte Jesús rese.

¹⁸ Mbiamo cheẽ aicua tuchite raque quia jẽsi co. Gracias, aete raque quia Dios je ãquĩ ñi co.

¹⁹ Dios quiato ñumunua mose, acheẽ nyecuase rete ee. Secheẽ jua chõ ndaque. Cinco palabras. Mbiamo cheẽ nda asaã eã ee. Mbiamo cheẽ icuayãte quia ñene. Emo nda ñee oco raque ee, icuayãte rae.

²⁰ Mbiam riirĩ naate ra jẽingochĩ, Seresenda. Jendua quiatu secheẽ ndese mbiam cuasu rã. Coche jẽingo nguiã mbiam riirĩ na mbae icuã naa ndocoĩ.

²¹ ã ndei Dios cheẽ mbesa ji ã:

Mbiamo tamondo rei secheẽ nenei nenei sacua ã serimba je.

Secheẽ nda esenei senei ndei serimba je mbiamo cheẽ je.

Aquere ra serimba secheẽ mumba i i tuchi querabe, i que Dios ra,

i que embesa ji ra.

²² Jemo mbiamo cheẽ naa naa mose, Jesús quiatoã mundua sacua Dios rese chõ ãquĩ nde. Jẽ Dios cheẽ

nenei nenei mose, Jesús quiato mundua sacua ño Dios rese chõ ùquĩ no nde.

²³ Jesús quiato ñumunua nua mose u, sã mbiamo cheẽ naa naa ja eã u. Jẽ mbiamo cheẽ naa naa ja mose ra Jesús quiatoã ñee jẽje. “Earacuayã” i ra ique mose mae jendese.

²⁴ Coche jẽingo nguiã Dios cheẽ nenei nenei ja jeñumunua mose. Jesús quiatoã mo ique mose jendea, ndua ndua tuchi ra huicua ndese. —Seicua tuchi chõ aico se re, i ra jeñee andu mose.

²⁵ Ae rese ndua ndua uchiangui renda icua nae, Espiritu Turã ae ra ùquĩ mbuchecua checua nguiã ee. Nyebe ra ngoi nguiã ndese ñee turã Dios je. —Dios riqui tuchi jendese a, i ra ñee jẽje.

Mbae jẽsaã turã turã ja chõ nguia jeñumunua nua mose

²⁶ —Eĩ jenye quiatu quia ñumunua Jesús rĩ, ae ra jẽje cote. Emo irasei rasei. Emo mbia mbaaquiato quiatu Jesús rĩ. Emo Dios cheẽ icua icua mbia je no. Emo mbiamo cheẽ naa naa no. Emo mbiamo cheẽ mbiasa asa ee no. Jenyuuru uru chõ nguia. Mbia mingo ja sacua Dios rese chõ ùquĩ nde.

²⁷ Mbiamo cheẽ jẽsaã saã mose ñumunua mose, jẽ nyeremoño ño jeñee ñee. Jenyuuru uru chõ nguia. Sã emo ndiqui echeẽ mbiasa asa.

²⁸ Jemo echeemo mbiasa aquiata mose, mbi amo cheẽ nda jẽsaã saãchĩ, jeñumunua mose. Jeñumunua eã mose quiatu mbiamo cheẽ jẽsaã saã jẽ ae Dios je.

²⁹ Ae ra Dios cheẽ senei senei mbia chumunua mose nae, sã nyeremoño ño ñee. Sã eataque ndua

ndua ũquĩ ñee ndese. Eĩ ngue ra, i sacua. Eĩ eã ngue ra, i sacua abe echeẽ icua mose no.

³⁰ Emo chĩ mose Jesús quiato ataque mbaa quiatu quiatu, emo nda ñeechĩ echeẽ cúaa. —Nde abe ã embuchecua mbia je, i mose Dios emo je, sã ñiinda ñee ja rã nyii.

³¹ —Nde abe ã embuchecua mbia je, i mose Dios jemo je, jenyuuru uru chõ nguia ñee. Mbua Dios cheẽ icua ja sacua. Mbua siqui tuchi sacua Dios rese.

³² —Nde abe ã embuchecua mbia je, i mose Dios emo je, sã emo ndaarõ mbirĩ na huĩ, emo chĩ mose Dios cheẽ nenei nenei.

³³ Jemo ñee mose jenongue cheẽ cúaa, Dios biãte ũquí. Jeñee turã mose nyuuru uru, ũquí nguia Dios bite re. Eĩ ja chõ Dios quiato nguia iglesia jenda ja.

³⁴ Jeñumunua nua mose Dios riĩ, cuña mo nda ñeechĩ. Eĩ si que Moisés chimbesa no nda. Sã cuña ndiqui mbua cheẽ mumbayã mbei.

³⁵ —Ũquí embuchecua seje, i aroneate cuña ñee mbua chumunua mose. Uchuchua quia cuña ñee ngu je, ñimbaaquiatuse mose. Cuña mo ñee aroneate Jesús quiato chumunua nua ite re.

³⁶ —Ichõĩño nguia ¿jenye quia secheẽ mose re? Jẽ nane je eã ngue Dios ñee ndesẽ. Jẽ mii je eã ngue Dios ñee ndesẽ.

³⁷ Secheẽ ae eã ambesa nguia jẽje co. Dios cheẽ ño ambesa nguia jẽje. —Dios que uquirãcuã mee seje ra. Ucheẽ nenei nenei sacua, i mose jemo ñee, sã ũquí nane ñee serĩ. —Dios cheẽ tuchi chõ Pablo senei senei nguia, sã i serĩ.

³⁸ Ũquí secheẽ isi sereã mose, jẽhui chõ esi. Sã

eaquiatsuã ae riqui.

³⁹ ¡Dios cheẽ jẽsenei seneise tuchi quiatu jẽ! Jemo mbiamo cheẽ naa naa mose ¡echeẽ nda jẽsiquisã quisãchĩ jẽ!

⁴⁰ ¡Mbae jẽsaã turã turã ja chõ nguia jeñumunua nua mose jẽ! Jenyuuru uru turã ño nguia.

15

Cristo quera si mose

¹ Dios cheẽ turã ngue asenei senei nguia jẽje Jesucristo riñ nae, ãquĩ sí rese chõ aico nguiã jemu-ndua ndua co. Ñquĩ ngue jẽisi turãte. Jẽingo beite ãquĩ ndese ãquĩ.

² Ñquĩ ndiqui jemingo beite ãquĩ, jẽtesareia mose secheẽ si. Ñquĩ jẽingo Jesucristo icua iruã ãquĩ.

³ Ae Dios senei senei seje nae, ãquĩ nane ngue asenei senei jẽje ra: Jesucristo que mano nandeicua ndiquicharõ. Embesa ji cheẽ nguire.

⁴ Mbia que ehati rei. Tres días mose que quera si. Embesa ji cheẽ nguire.

⁵ Quera si mose que nyecua Pedro je. Aquere que nyecua uchimbaaquiatu doce je cote.

⁶ Quinientos uquiato je que nyecua cote. Hue equiatio chi ja mose ñumunua. Ñquĩ tubiriãte riquiã. Emo emo ngue mano nda.

⁷ Nyecua que Jacobo abe je cote no. Aquere que nyecua uchimbaaquiatu jaje cote.

⁸ Nyecua nyecua jare mbia je que nyecua chee se abe je cote ra. Sã cuña ndiqui erã mo mbua no, ãquĩ na si chõ aico rei nguiã se co.

9 Se quia señetẽ jiri riqui nguiã Jesús chimbaaquiato ataque si co. —Jesús chimbaaquiato chõ se re, ae eã jiri quia co. Seicuã tuchi quiatu ngue Dios quiato je nyii re.

10 Dios turã ae semingo turã nguiã co cote. Dios turã ñooño eã ño eriqui nguiã seje co. Se abe que serecoteã jiri riqui nguiã Jesús rese echimbaaquiato ataque si ra. Mbae raã naa Jesús je. Se ae eã ño ngue aico nguiã mbae rese. Dios turã ae ngue semingo nguiã mbae rese.

11 —Aba Dios cheẽ senei senei tuchite quia reae, ure ãte equia co. Ñquiã ñene. Uresenei senei ja chõ equia ã ndesẽ. Jẽ ngue urechisenei senei jëisi turãte quia resẽ.

Mbia raaque quera si mose

12 —Cristo que quera si manonde ra, ure que equia erenei nenei jëje. Urecheẽ ngue jëisi turã ndei nyii. ¿Mbaerã jemo ndiqui ñee cote re? —Mbia raaque ra querayã mbei, i cote re.

13 ¿Cristo raaque bei namo nde? —Mbia raaque ra querayã mbei, jenyete mose, ¿mañi Cristo raaque quera re no?

14 Cristo raaque quera si eã mose, eĩ nda ureico rei echeẽ nenei nenei iru chõ. Eĩ nda Jesucristo jëicua iru chõ ndei.

15 Cristo raaque quera si eã mose, eĩ nda ureico rei ñee ñooño Dios rĩ mbia je. —Dios que Cristo mbuquera si ra, ure bei equia ã ndesẽ. Mbia raaque quera si eã mose, i nda Dios Jesucristo raaque mbuquera si eã ndei no.

16 Mbia raaque querayã mose, eĩ nda Cristo raaque quera eãte rei no.

17 Cristo raaque quera eã mose, eĩ nda jẽingo rei Cristo icua iru no. Eĩ nda jẽingo rei jẽicua nderequia beite no.

18 Eĩ nda Cristo quiato quiachã mbei rei manonde no.

19 A mii eã ño Cristo riqui nguiã nanderese. Nandemanonde abe ra eriqui bei nanderese no. A mii mose, eĩ nda nandeya eã tuchite riqui rei mbia mo si no.

20 Cristo que quera si ra. Ae bei tuchi. Ae rane ngue quera nyii ra. Nyebe ra mbia abe quera si eraã si cote no.

21 Adán mii nane ngue mano huiicua je cose ra. Nyebe nandeco nguiã mano mano mbei cote. Eĩ si chõ Cristo mii quera si nguiã cote. Nyebe ra uquiato mbuquera si ja cote.

22 Sã nandeco mano mano ja Adán ndui ã no, eĩ si ra Cristo nandembuquera quera no.

23 Dios que Cristo rane mbuquera nandesi ra. Cristo tube mose, uquiato raaque ra embuquera ja cote.

24 Cristo tube mose ra mbae ibi jenda ua ja cote. Mbia mo nda siquiã ererecua cote. Cristo ra mbae mee ja Dios je cote. Cristo ra mbia rerecua mbutiã ja cote.

25 Ererecuarã tuchi ra Cristo cote. Uquiatoã nda embuquiachã ja tuchi chee cote, ae siqui mose ererecuarã.

26 Mbia mano mano mose, Cristo biãte ũqui. Ũqui abe ra Cristo mbuquiachã tuchi mbia si cote. Mbae icua ataque ra embuquiachã ja rã nyii.

27 Dios que mbae mee ja Cristo je ra. Cristo mbae rerecua ja tuchi sacua. —Cristo ra mbae rerecua ja

tuchi, i ñi embesa ji re. Dios rerecua eã ndaque. Mbae ja rerecua chõ nda Cristo.

²⁸ Dios mbae mee ja mose Cristo je, Cristo ra ñimee Dios je cote no. Eriirĩte quia ñene. Eĩ nda Dios mbia rerecua ja tuchi cote.

²⁹ Emo emo ño bautizar i nguiã eraaque rĩ ãquĩ. Eraaque quera si eã mose ¿mbaerã ãquĩ ndiqui bautizar i eraaque rĩ ãnde?

³⁰ Mbia raaque quera eã mose, eĩ nda ureico rei Dios cheẽ nenei nenei ãte mbia je co. Eĩ nda mbia riqui rei ureiquia serĩ serĩ ãte.

³¹ Mbia “taiquia” i bei beite quia seje ã. Acheẽ ñooño eãte jẽje. Sã seyate riqui jendese co no.

³² Nyacua rã tuchi que Efesó jenda riqui seje ra. ãquĩ ngue asiquisã tuchi rei quia ñee nda. Eĩ nda asiquisã quisã iru rei no, mbia raaque quera eã mose. Mbia raaque quera eã mose, eĩ nda nandeco rei ñee. —Mbae nandembei chooño. Mbae nandeu chooño. Mano mbei cote, i.

³³ —Eĩ jenye quiatu jichĩ nda mbia jembĩrĩ irĩ jẽ! Jeingo mose mbia icuã ndese, jembĩcuã icuã nda jẽ abe cote.

³⁴ Jendua quiatu. Mbae turã nguiatu jẽsaã saã nguia. Mbae icuã jẽsaã eã nguiatu quia. Jemo emo ndiqui Dios icuayãte ãquĩ. Aba ireĩ tuchi quiarei ãquĩ.

Jesús quiato rete yasu ja ra cote

³⁵ Jemo nda ñee ndei. —¿Mañi nda eraaque quera si re? ¿Mañi nda erete cote re? i ra jemo ñee ndeae.

³⁶ Ndua eã ño nguiã ãquĩ. Sã nandeco mbae eĩ tiquia no. Mbae eĩ nda soõ suri sacuã cote. Eĩ si chõ

nda nanderete soõ nandemano mose. Nanderete yasu sacua cote.

³⁷ Sã nandeico mbae eĩ tiquia no. Ei ra nandechitiquiayã. Ieĩ achõ ño nandechitiquia nguiã. Quiata a eĩ. Mbaemo eĩ abe no. Ei quia nda suri nguiã cote.

³⁸ —I ño nda ndei, i chõ Dios nguiã mbae eĩ jaje.

³⁹ Nanderete rã ño mbae eĩ nde. Eĩ ja eã ño mbae rete re. Emo ño mbia rete no nde. Emo ño quiaa rinda rete no nde. Ae mbebe quia, erete ae chõ ãquĩ no nde. Sira ae erete mo no nde.

⁴⁰ Ibatenda ae rei erete mo no. Ibi jenda ae erete mo no. Ibatenda ae rei erete turã mo no. Ibi jenda ae rei erete turã mo no. Eĩ ja eã ño mbae rete re.

⁴¹ Nyasi rendi rã eã ño tenda rendi re. Nyasi tata rendi rã eã abe no. Nyasi tata rendi chiabi abi chõ eno nde. Erendi turã ja raque.

⁴² Eĩ si chõ mbia raaque quera je re. Ae mbia raaque nandechitiquia quia nae, ãquĩ ndei soõ je ãquĩ. Ae ra quera si nae, ãquĩ nda soõ eã mbei cote. Manoa mbei ra eno.

⁴³ Ae nandechitiquia quia nae, eraaque tuchi chõ ãquĩ nde. Ae ra quera si nae, enininya tuchi chõ ãquĩ cote re. Etiquia mose, equirãcuã nea tuchi chõ aque mose re. Equera si mose, equirãcuã tuchi chõ aque mose cote re.

⁴⁴ ã nanderete nandereco ã nae, erete achõ ño ãquĩ nde. Quera si mose ra nyiicabo tuchi cote. Mbae ibi jenda ra mano ja. Ae ibi jenda eã nae, ãquĩ nda manoa no.

⁴⁵ ã ndei embesa ji cheẽ ã: “Ae Dios chao Adán nyii nae, aque reco que siqui rei nyii ra”, i que

embesa ji ra. Ae tu Adán ndui Jesucristo, mbia mingo beisa rei aque.

⁴⁶ ã nanderete nandereco ã nae, mano mano mbei arõte. Ûqui nane nandereco nanderete ã. Aquere quiatu ra nanderetemo nandereco cote. Manoa mbei sacua cote.

⁴⁷ Ae Dios chao Adán nyii nae, ibi je chõ eao nguiã nyii. Nyebe ibi jenda bei ae re. Ae tu Adán ndui nae, Jesucristo i equia ee nae, ibatenda chõ aque re.

⁴⁸ ã nanderete nandereco ã nae, Adán ndete rã si chõ nanderete nandereco nguiã ã. Ibi jenda chõ ã nanderete re. Ae nanderete ra quera si nae, ibatenda rete rã ño nda ãqui cote.

⁴⁹ Ae Dios chao ibi je nyii nae, Adán i equia ee nae, aque rã si chõ nandeco nguiã nande abe namo ã. Aquere ra nandeco ibatenda rete rã cote.

⁵⁰ Nanderoo achõ ño nanderete re. Nanderuqui abe no. Ûqui oso aroneate ibate Dios récuaa. Ae mano nguia soõ nae, ãqui nyo i aroneate Dios récuaa. Ae mbia riqui manoa mbeite nae, huee nanderoo oso aroneate.

⁵¹ Ae rese mbia riqui jiranuate nae, ãqui tasenei na jêje. Nandemano ja eã ndae. Nandechiicabo ja chõ ndae.

⁵² Corneta pu i mose ra Dios nanderete mbuchiicabo asi cote. Nanderesa pirirã i rã nda Dios nanderete mbuchiicabo asi. Corneta pu i mose ra eraaque abe quera si manoa mbei nonde cote. Aque mose ra nandechiicabo bei nande abe cote.

⁵³ Ae nanderete nandereco namo ã nae, ã nda nyiicabo tuchi cote. Manoa mbei sacua cote. Soõ eã mbei nonde cote.

⁵⁴ Nanderete nyiicabo mose, ũquĩ mose ra embesa ji cheẽ io cote: “Nandemano ngue ua tuchi cote ra”, i ñi embesa ji re.

⁵⁵ Nanderasi ra nandeiquiayã cote. Ibicua ra nanderaaroã cote.

⁵⁶ Nandeicuã ño nandemano mbu uquia nguiã nande je co. Moisés chimbesa chõ nandeicuã mbuchecua nguiã nande je co.

⁵⁷ Dios ra nandemano siquisã mbei nandesì cote Jesucristo rĩ. Nyebe nandeico nguiã gracias i tuchi Dios je ã cote.

⁵⁸ Seresenda jjeñimbirãcuã tuchi quiatu quia jẽ! ¡Jesucristo rese jẽingo bei quiatu quia jẽ! ¡Echeẽ jẽsenei senei mbei tuchi quiatu quia jẽ! Ae jẽsaã saã nguia Jesucristo rese nae, jẽsaã iru iruã ño nguiã ũquĩ.

16

Ofrenda jembae jendecoquiato, i Pablo

¹ Ae ofrenda ra jemondo Jesús icuasa je nae, ũquĩ tasenei jẽje. Acheẽ ngue Jesús quiato je ra. Galacia jenda je ra. Eraã si chõ jẽingo ae.

² Domingo mose bei jẽingo mbae rerecúe cúe ae. Ofrendar ã. Ae mbae isi atate quia, sã aque mbae rerecúe ata jiri ae. Ae mbae isi mĩte quia, sã aque co mĩ jiri rerecúe ofrendarã ae. Ũquĩ jemunua ño seso nonde jendea ae. Eĩ mose ra ofrendarã jẽsaã eã seico mose jendese cote.

³ Secuasẽ mose huee, jẽimondo sacuã mo jẽirabo ño, ofrenda rerao sacuã. Cartas nandemondo ũquĩ oo. Ofrenda rese. Ũquĩ nda amondo

Jerusalén ña. Ofrenda rerao sacuañ hue jenda Jesús quiato je.

⁴ Ofrenda tubiriã mose ra aso se abe erese.

Aso ra jendea, i Pablo

⁵ Macedonia ñi nane nda acua. Aquere ra aso ngasẽ jêje cote.

⁶ Aico arete jiri ra jendese huee reae. Ama mose bei ra aico jendese huee reae. Eĩ jenye nda sembu-cuata turã mondo cote, seso mose mbaranguiti.

⁷ Amaeño sereãte jendese secua mose. Aico arese rete jendese huee, Dios eno i mose seje.

⁸ Efeso taico are rã nyii. Fiesta de Pentecostés mose.

⁹ Dios cheẽ asenei senei arõ tuchite mbia je a. Mbia seanduse rete. Emo emo icuañ icuañte riqui Dios cheẽ nenei nenei mose seje ã no.

¹⁰ Timoteo ngasẽ mose jêje ¡jêisi turã ño jê! ¡Sã eireĩ nguiañ tuchi jêsi jê! Se rã si chõ eriqui bei nguiañ Dios cheẽ nenei nenei mbia je aque.

¹¹ ¡Nyebe jemo Timoteo isiteã eã jê! ¡Jembucuata turã ño imbu seje jê! Aico eraarõ arõ tuchi se a. Nanderesenda ataque rese.

¹² Acheẽ ndei que nanderesenda Apolos je ra. — Nde abe eso erea, ae rei que ee jeniñ nda. Oso sereã ngue namo nda. Osobi mose quia nda esi nguiañ jendea cote.

Pablo ñee hui bei

¹³ ¡Jendua tuchi quiatu quia jê! ¡Jesucristo jêicua tuchi quiatu quia jê! ¡Jêsiquicheã tuchi quiatu quia jê! ¡Jêquirãcuã tuchi quiatu quia jê!

¹⁴ ¡Mbia rese jenyesequa tuchi quiatu quia mbae rañ naa mose jê!

15 Seresenda, jêingo Estéfanos chuchua jenda icua jate ùquĩ. Ûquĩ nane tuchi ngue Jesús icua Acaya jenda nyii nae. Ûquĩ ndiqui mbae mondo mondo bei Jesús quiato je ùquĩ. Ûquĩ ndiqui mbae raã naa mbei Jesús quiato je ùquĩ.

16 Ûquĩ na si chõ jêingo. Ûquĩ ñee nda jemumbachĩ. Ae Dios cheẽ senei senei nguia nae ¡ùquĩ ñee nda jemumbachĩ jê!

17 Seya tuchi Estéfanos ngaẽ mose serea. Fortunato abe. Acaico abe. Ûquĩ ngue sembia tuchi ngaẽ jêingoã mose a ra. Ae jêsaã aroneate quia seje nae, ùquĩ ño ngue esaã ngaẽ seje a ra.

18 Ûquĩ ngue sechiã mbucoite Dios rese ra. Jeñia abe mbucoite ereae. Gracias jenyê bei ùquĩ je.

19 Jesús quiato Asia jenda ja chõ saludos mondo quia jêje aque. Aquila abe saludos mondo quia jêje aque. Priscila abe. Ae Jesús quiato ñumunua nua nguia ùquĩ nyuchua nae, ùquĩ ja abe saludos mondo quia jêje Jesucristo rĩĩ aque.

20 Jesús quiato a jenda ja saludos mondo quia jêje aque. Jenyiquiaama ama ja quiatu quia Jesús rĩĩ.

21 Seo je tuchi co saludo ambesa mondo quia jêje aque. Pablo tuchi chõ se re.

22 Emo nyesequayã mose Jesucristo rese, sã Dios embasi. Echu, Jesucristo.

23 Jesucristo turã nda siqui jendese chã.

24 Achesequa ja chõ nguiã jendese Jesucristo rĩĩ co. Amén.

Mbia Cheë
New Testament in Sirionó (BL:srq:Sirionó)

copyright © 1977 Wycliffe Bible Translators, Inc.

Language: Sirionó

Translation by: Wycliffe Bible Translators, Inc.

Sirionó [srq], Bolivia

Copyright Information

© 1977, Liga Bíblica Mundial del Hogar. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sirionó

© 1977, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
eb2687f2-4654-5d43-8ec2-3ee35e8a435e